

5106.

3

2265

2

XVII, 529.

*Carmine complexus est Res Janicas aliquot hinc  
quare in Jania in Elegyphiling Jania Maro.  
Vil-dai. Worschi C. 1. Monum. Janic. c. ult.*

C. ERASMI  
MICHAELII  
LÆTI

BVCOLICA,

*Cum dedicatoria*  
PHILIPPI MELANTHONIS  
*Prefatione.*

VVITEBERGÆ

Anno 1560.

G. ERASMUS  
MICHAELIS  
L. M.  
BACOLICA



Vg 4471



**SERENISSIMO**  
**PRINCIPI AC PO-**  
*tentissimo Domino, D. FRI-*  
*DERICO, II. Danorum Nort-*  
*uagicorum, Gottorum Vandalor-*  
*umq; Regi; Duci Slesuicensi, Hol-*  
*satiae, Stormariae ac Ditmarsiae,*  
*Comiti in Oldenborg ac Deel-*  
*menhorst, Domino suo*  
*Clementissimo*  
*S. D.*



**VLCISSI-**  
*ma & necessaria*  
*consolatio quoti-*  
*die in Symbolo*  
*repetitur: Credo*  
*esse sanctam Ec-*  
*clesiam Catholi-*  
*cam: quæ sæpe multumq; cogitan-*  
*da*

† 2

EPISTOLA

da est, & opponenda confusionibus generis humani, propter quas anxie mentes quærunt, quæ pars generis humani Deo placeat. Sed certò statuamus, nequaquam dubias esse patefactiones diuinas, quæ testantur genus humanum non casu ex Democriti atomis confluisse, nec tantum ad miserias nasci, Sed esse cœtum distinctum à reliqua multitudine hominum, in quo fulgebit Deus. manifesta luce in tota æternitate, & cui communicabit suam sapientiam sine erroribus, suam iusticiam sine labe, & suam læticiam sine consternatione & sine tristi fremitu.

Qui sit autem hic cœtus verè  
placens

## DEDICATORIA.

placens Deo, & ubi sit, sapienter  
in testimonijs diuinis quærendum  
est: Non enim Deus perire vniuer-  
sum genus humanum voluit, nec  
frustrà Filium misit proferentem  
decretum de salute nostra, nec frus-  
strà constituit eum victimam  
pro nobis. Etsi hæc sapientia lon-  
gè extra & supra iudicia creatura-  
rum posita est, tamen diuinis testi-  
monijs adsentiamur, & in hanc ar-  
cem, id est, in veram Ecclesiam nos  
includamus, & ad protegendam,  
fouendam & ornandam eam consi-  
lia, labores & studia referamus.  
Hanc obedientiam Deo gratam  
esse non dubium est, sicut scriptum  
est: Beati qui habitant in domo tua  
Domine.

† 3

Etsi

## EPISTOLA

Etsi autem multi gloriosi Reges & Duces athei hanc sapientiam contempserunt, ut Alexander, Iulius, Pompeius & alij innumerabiles, tamen & aliquos insignes Deus ad Ecclesiae societatem vocavit: Davidem, Iosaphat, Ezechiam, Iosiam, Cyrum, Constantinum, Theodosium.

His & Patrem tuum Regem Christianum iustissime annueramus. Etenim & ipse recte inuocavit Deum, & in plurimis gentibus Regni sui incorruptam Euangelij uocem restituit, & Idola deleuit. In omnibus pijs historijs uult Deus haec sua beneficia aspici & celebrari: & ut gloria eius illustretur



## DEDICATORIA.

stretur, & ut multorum sapientum  
& piorum principum exemplis con-  
firmemur. Fuerunt illustres & glo-  
liosæ ipsius victoriæ in armis, Sed  
multò gloriosius est, quòd harum  
victoriarum finem esse voluit, non  
ocium populi, non Fisci incrementa,  
propter quæ sæpe bella geruntur, sed  
piam & salutarem Ecclesiarum  
constitutione legum, iudiciorum &  
disciplinæ emendationem.

Hæc cum splendido Carmine  
vir excellens eruditione, consilio &  
venæ flumine C. Erasmus Lætus,  
in maxima huius operis parte com-  
plexus sit, & tibi Rex InclYTE, &  
vniuersæ Daniæ hoc ornamentum  
gratulor. Nec tantum venæ vber-  
† 4 tatem,

EPISTOLA

Libertatem, sed honestissimam uo-  
 luntatem eius boni & eruditi lauda-  
 bunt, quòd cum sciat Venam verè  
 opus & donum Dei esse, potissi-  
 mùm eam in diuinis laudibus consu-  
 mit. Reuerenter igitur oro Re-  
 giam Celsitudinem tuam, ut hoc &  
 ingenij Erasmi & voluntatis speci-  
 men clementer accipiat.

Ego verò tametsi totum opus  
 & libenter lego, & iudicium auto-  
 ris magnifacio, quòd cum ea scriben-  
 di vena præstet, quam & eruditos  
 nunc amare, & gratam scio futu-  
 ram esse posteris, ad res vtilis po-  
 tius & honestas animum ac dicen-  
 di vires conferat, quibus & gloria  
 patriæ ingens conciliari, & bono-  
 rum

## DEDICATORIA.

rum voluntates retineri queant, quàm ad tragica quædam & maleuola scripta, quibus aut distractiones animorum in honestis Regnis, aut Nationum odia vel exuscitari vel confirmari possent: Imprimis tamen ea parte delector, quæ Patris tui, Tuæq; etiam Maiestatis mentionem facit, quod in illa quidem comprehensa esse iudico, quæ omnino necesse est in Ecclesia ac Scholasticorum cætibus ob memoriam à posteritate retineri. Itaq; non tantum moderationem ipsius ac consilium probaui, verum etiam hortatus sum, vt hoc scriptum in publicum emitteret, & quæ prudenter elaborarat, alijs ante reditum in patriam communicaret.

+ 5

Gaudeo

## EPISTOLA

Gaudeo verò doctrinis & Musis, quæ alibi horribili sæuicia dilacerantur, tamen in Dania & hospicia & Halcyonia mediocria restare. Nec facile Regnum ullum hoc tempore maiore frequentia eruditorum antecellit. Cùm mihi interdum in memoriam venit Clarissimus vir Iohannes Synningius, quem et nos olim in hac Schola vnicè dileximus, & ante aliquot annos in patria ob eximiam eruditionem ac pietatem, Testimonio Doctorum in Theologia ornatum audiuius, non possum equidem non dolere, tam vtilem Regno atq; Ecclesiæ Christi virum, tanto ætatis flore tantaq; omnium nostrorum expectatione è medio abreptum esse: cùm non do-

ctrina

## DEDICATORIA.

Etrina tantum, ingenio, studijs ac diligencia Cōterraneos suos propemodum superaret, verum etiā modestia atq; integritate ita probaretur uniuersis, ut nihil penè me ex illa terra, quod quidem ad ingenij præstantiam morumq; suauitatem attinet, elegātius vidisse recordari possum, quanquam & Palladij labores ac diligētiam nouimus, et in docendo reētudinē meritò prædicamus: Tamen cum & multos adhuc in Regno Maiestatis tuæ præclarè eruditos esse sciam, et plures propediem futuros sperē, qui doctrina commendari mereātur, cum primis certè lætor. Hāc ad rem dulcissima pax, & tua munificentia digniss: bono Rege plurimum conducit. Sæpe enim narrat

rat

EPISTOLA.

rat nobis Erasmus noster tuam er-  
ga se, erga Iacobum Bordingum  
& multos alios eruditissimos & in-  
tegerrimos uiros regiam beneficen-  
tiam: eamq; ob causam decreuit om-  
ne studium & omnes ingenij vires  
ad ornandas Ecclesias, & reti-  
nendum pium consensum con-  
ferre, memor seuerissimi  
mandati: Diligite ue-  
ritatem & pa-  
cem.

Date die 4. Aprilis.

Anno 1560.

T. Maiestati  
deditiss.

Philippus  
Melanthon.

C. ERASMI  
MICHAELII  
LÆTI,

ECLOGA I. DAMON.

DAMON, MOERIS.

Fortè sub æstiuo Phœbeæ lampadis ortu,  
Quàm prius extulerat candentes lumine uultus  
Titan, Eoum radios iaculatus in orbem:  
Egressus stabulis se matutinus agebat  
In sylvas pastor: quo non solertior alter  
Aut curare greges, aut quærere pascua ductis.  
Fluminis ad ripas ubi constitit ergo, repandæ  
Incubuit fago, precibusq; patentibus ora  
Soluit, & ingenuo profudit pectora questu.  
Nascere, mortalis decus & spes unica uitæ  
Lucifer, ac tenues dispelle caloribus umbras:  
Præueniensq; diem celera, noctisq; tenebras  
Ardenti raptas disperge per aëra curru.  
Cumq; ea fatus, humum circum apparere nitentem

A

Ac rigi

D A M O N

Ac rigidos tremulo splendescere lumine montes  
 Vidit, & excelsas motare cacumina quercus:  
 Respexit, Phoebumq; suo iam lumine, cernit  
 Spargere nutantes, permixtis flatibus, ignes:  
 Attollensq; manus: Quid nunc, ait, amplius optem  
 O Sol, qui faciles in uerba precantia uultus  
 Præstiteris, miseroscq; leuas mortalibus annos,  
 Pressaq; solaris nitido præcordia fructu:  
 Quam tua sedata suboriri corpora luce  
 Ventorumq; inhibere faces longosq; labores:  
 Nunc quibus algentes infestant uiribus undas  
 Peruolitantq; solo, nemorumq; cacumina lābunt:  
 Quæ dare si nostris dignere precatibus, agnum  
 Iam capias, patrio quæ concidet hostia ritu.  
 Dixerat, & toto non tantum albescere cælo  
 Corpora prospexit, densis caput obruta nimbis  
 Quæ prius occulerant, medijsq; tumultibus hæret:  
 Æolios etiam fratres & flamina, uastis  
 Quæ fera comprehensum pertentant uiribus orbem  
 Conturbantq; solum, atq; imò freta cærulea fundo  
 Excutiunt, fluuiosq; minis petulantibus urgent:  
 Concessisse uidet, notosq; petisse penates:  
 Rex ubi luctantes uel stringit carcere uentos,  
 Vel Diuum monitis impellit, & aëra miscet:

Ergo

Moe



## ECLOGA I.

Ergò ubi tranquillo sese Deus ætheris igni  
 Induit, & subito siluerunt nubila lapsu,  
 Suspiciens cœlum pastor: Tibi Maxime grates  
 Sol, ait, exoluo, promptas pastoribus aures,  
 Qui sinis esse tuas, & adhuc cultoribus adsis.  
 Ach quantum est, ueteris meminisse uolumina uitæ,  
 Atq; recordantem priscas agitare querelas  
 Pectoribus, miseræq; faces expendere sortis.  
 Scilicet Amphryso cum Pastor ab amne redires,  
 Tessalicos permensus agros, armenta q; linquis  
 Principis Admeti, quæ pascere dura coactus,  
 Quòd tua Cyclopes fudisset dextra cruentos:  
 Adduxisse rear tecum, cœloq; locasse  
 Humanas curas, generisq; pericula nostri.  
 Salue uera Deum series, Superumq; corona,  
 Labere propitius, meliorq; reuertere nobis  
 Semper, & epingui completo *mapalia* fructu.

Sed mihi quis Moerin casusue Deusue sodalem  
 Mittit, & auroræ primos producit ad ignes?  
 Sis foelix quacumq; uenis, ô dulce senectus  
 Solamen nostræ: quid tu tam manè solutos  
 In sua prata boues, armenta q; tota perurges?  
 Tu nisi consuetum, nec quod facis, horret ab usu.  
**Mœ.** Cornipedum tu sæpè greges, meritosq; iuuenkos

DAMON

O Damon, memorare soles in pinguia mitti  
 Pasqua fas, cum prima novos induxerit ortus  
 Auroræ facies, penetratq; recentior auras  
 Cynthius has superas nostroq; illabitur orbi.  
 Quas latore quidem Damone mapalia leges  
 Accepere, nouoq; pecus cum Sole reducunt  
 E stabulis, Phœbiq; faces ortumq; sequuntur.

Da. Rectè equidem. Sed quid solito plus tristior esse  
 Tute uidere mihi? cur frons contracta genæq;  
 Nescio quid tacitiue mali, subitiue doloris  
 Arguit, & mœsto perfundit lumina uultu?  
 Annè armenta tibi sunt salua, bouesq; caperq;  
 Lanigerumq; pecus, pressis cum matribus agni,  
 Atq; aries, camuris hirtæ cui cornibus aures  
 Et solitus præire, greges in pabula ducit?

Mœ. Cuncta quidē Damō, sunt hæc mihi salua, capellas  
 Pan etenim nostras, & oues & limina curat:  
 Et frustra insidias pertentat ouilia circum  
 Clausa lupus, uanaq; furit spe dirus arena.

Da. Idem Pan, facilis nostro quoque ludit in aruo  
 Sylvanusq; senex, & quæ pastoribus omni  
 Culta Pales fructu, Nymphisq; sororibus Aura.  
 En numero duplicata uides armenta, bouesq;  
 Proleq; sub gemina dimittunt ubera matres.

Deniq;

ECLOGA I.

Deniq; foecundis plerumq; hinc floribus omnis  
Parturit, & iustis turgescit fructibus arbos.

At quid tu gemitus suspiriaq; ardua ducis?  
Fare age, nec tacitos meme celaueris ictus  
Pectoris: ac animi clausos aperito recessus.

Moe. Usq; quidē haud grauis est, cui me fortuna dolori  
Seuior obiecit, nec arundine fixit acerba  
Hoc caput, ut nostris non sit mensura querelis.  
Id tantum hesternum narratum luce, molestat:  
Atq; animum tristi percellit imagine, dum nos  
Singula metimur taciturnae noctis in umbra,  
Et socio uigiles subeunda pericla tuemur.

Da. Scilicet in Scythias quod ouilia Phaedrius oras  
Proferet, atq; greges longinquis pascat in aruis:  
Forsitan hoc animos, & amica mapalia turbat.

Moe. Qui non turbaret Damon, discessus amici,  
Quo melius non alter alit pecudesq; bouesq;  
Seraq; maturo curat foenilia pastu?  
Qui canere hic nobis solitus sacra carmina Vates  
Saepe quidem tristes, musarum laudibus horas  
Fallit, & Aonia duros leuat arte labores.  
Non etenim solum pecudes hic pascere doctus,  
Sollicitas etiam, correptus Apolline, nostras  
Excitat, & dulci reficit modulamine mentes.

## D A M O N

Is recreata fouet solus tua pectora Damon,  
 Versibus ut scriptum imparibus tibi Caesaris olim  
 Pandit opus, latiusq; refert quæ gesta Monarchis.  
 Deniq; quòd tali sit tempore lectus, & illis  
 Saltibus ignotis errabit, aquasq; lacusq;  
 Transiet, & dubiæ uitam committet eremo.  
 » Cui letis etenim superata est fructibus æstas,  
 » Ille foris minimè facili tolerare rigorem  
 » Hybernum potis ingenio, sed dura perosus  
 » Fata gemit, totoq; miser fugit aspera sensu:  
 Et merito. Neq; enim Myrmicis dicta coloni  
 Ignorasse potes, qui nostræ semina uitæ  
 Dixerat æthereo cuidam finiq; bonoq;  
 Conditæ, nec miseris producta doloribus esse.  
 Nunc uerò aduersis plerumq; euentibus hæret  
 Hoc genus, & dura subit alta pericula sorte.  
Et mihi, nescio quo ueniat fatoué Deoué,  
Quos natura bonos finxit, uirtusq; sub auras,  
Extulit æthereas, nomenq; sacrauit olympo,  
Aut hos morte rapi primos, aut cladibus actos  
Comprenderi, & uarijs opplere laboribus æuum.  
 Et certè nostris longè placidissimus aruis  
 Phædrius hic uixit: seuo quem numine duci, (tem.  
 Et querimur meritò, & lacrymis comitamur eum.

Desine

ECLOGA I.

Da. Desine Mœri, tuis ea deplorare querelis,  
 Quæ fieri expediet, quibus & parere necesse est.  
 Phædrius in Scythiæ fauces & rura profectus  
 Rutthenos lustrabit agros, & ditia Mosci  
 Principis arua leget, pecudesq; per inuia ducet.

Mœ. Ergò tibi nostrum uolupte est discedere uatem,  
 Et miserum duris caput obiectare periclis?

Da. Et placet, & si quid suadendo possumus, ipsum  
 Istud agamus, ut hinc armenta bouesq; repulsos  
 Vertat, & Eois mersare paludibus agnos  
 Consuescat, pinguiq; solo nutrire capellas.

Mœ. Ach pecus indigno tantisper fidere ductum,  
 Dum Scythicas subeat lassumq; & triste pruinas.

Da. O nimium fausto pastorem numine, qui se  
 Quiq; armenta potis longum proferre sub ortum.  
 Hic, quanquam dulcis, sterili tamen hæret in aruo,  
 Et nimis excusso sustentat flore iuuenos.  
 Istic Plescouios, ditissima prædia, campos  
 Et Neogardiæ liquidas scaturiginis undas  
 Inuenit, ac pingui fertissima pabula succo:  
 Istic sunt amnes & flumina læta capellis  
 Balantumq; gregi, quibus utile sæpius undis  
 Defluere, ac riguo sordes purgarier æstu.  
 Hic sacri fontes Tanais, mæotide qui se

DAMON

Vndantiq; palude leuat, cursuq; diremptas  
 Hinc Asiae, hinc pingues Europae iungit arenas  
 Littoribus, geminumq; trahit sub fluctibus orbem.  
 Rha quoq; quae Volgam Ruttheno murmure scin=  
 Hic fluit, et rapido se uoluit in intima cursu, (dunt  
 Caspia qua iunctis gens accolit equora ripis.  
 Labitur hic Thurus, grandiq; Borysthenis alueo  
 Insilit, & mixtis Euxinum cursibus intrat.  
 Deniq; nec fluuios promptum est cōprehendere dicto  
 Nec populos, uastis quae plurima saltibus errat  
 Copia, nec gelidae subducunt corpora nocti.

**Mæ.** Vnde sed ista tibi sunt Damon cognita, quoue  
 Hos autore lacus, dispersaq; flumina nosti?

**Da.** Ut norim? iuuenes armentum pauimus istis  
 Mœri, locis: lateq; uagati ditia circum  
 Pascua, multiplici deprendimus omnia fructu  
 Effugere humanas, solertia pectora, curas.

**Mœ.** At nix alta premit constrictas frigore terras,  
 Et subtriste gelu mordaci percutit aestu.

**Da.** Vera quidem. Sed triste gelu ne dixeris: istud  
 Dulce meo letumq; gregi, pecorumq; magistro  
 Tum fuit, Eois cum nos sequeremur in agris  
 Aut hos fortè boues, aut horum Mœri parentes.  
 Inde mihi, quaecunq; manet fortuna salutem

Attulit,

ECLOGA I.

Attulit, & nostros aspexit diua labores,  
 Prouentuq; gerges, & nos cumulauit honore.

Mœ. Omnia non igitur sunt istic tristia: nec se  
 Protinus è mundo referat discedere, quisquis  
 In Scythiæ uastos pecudesq; bouesq; recessus  
 Vltrò agit, & longis statuit iumenta sub oris.

Da. Haud equidem: Sunt cuncta illic, pastoribus amplo  
 Quæ natura solet partirier ubere nostris:  
 Pascua leta solo, salientes fontibus undæ  
 Et saltus uirides, & ameni gramine campi,  
 Sylvarum tractus, ac dulci flumina ripa.  
 Deniq; uel medijs muscosi in uallibus amnes:  
 Vel segetum fœcunda acies, qua maxima terris  
 Planities exculta iacet, lateq; sub ortum  
 Et Boream, spacijs præmit æqua patentibus arua.  
 Postremò distincta etiam sunt omnia magni  
 Sideris, & iusto decurrunt tempora Sole.  
 Hic uer alternans, hic picta caloribus æstas  
 Autumnusq; cadens, & hyems glomerata pruinis.  
 Hic satio conferta fabis, hic improbus alta  
 Triticeis messor compleuerit horrea spicis.

Mœ. Sed uia longa quidem, magnisq; obnoxia curis,  
 Et, si uera ferunt, tacito coniuncta periclo. (tu

Da. Longa uia est: Sed .n. quæ sunt pulcherrima, ne

## D A M O N

Quòd sint longa, uelis deterrima protinus esse.  
 Virtutem duro memorant sudore paratam,  
 Mox sub difficili compressam sorte, decorem  
 Concipere, & pulcro nitidum splendescere uultu:  
Vt ferrum dura sublisum cote nitescit,  
Et scabros posuit tersa rubigine uultus.  
 Phædrius hæc igitur si noster adirit, ouesq;  
 Pascere nonnunquam peregrino uertice tentet,  
 Riphæis uicinus agris, pecudesq; uagantes  
 Prata per, & liquidos fluuiosq; lacusq; sequetur,  
 Virtutis confirmet iter, primoq; labore  
 Ingenij flammæ, & semina fausta recludet:  
 Nam qd possit, ad huc latet: et contemnitur hisce  
 Finibus, in patrio dum stridula cespite fundit  
 Carmina, nec uatum, pastores munera norint.

**Mœ.** Ast homines istic Damon, tetrosq; malosq;  
 Esse ferunt, Scythiæ turpissima monstra iuuentæ:  
 Quos neq; sancta mouet pietas, neq; maxima uir-  
 Sed scelus in crimen pellit, uitijsq; suburget (tus,  
 Pectora, nec turpes animo damnauerit ignes.

**Da.** Vera ais: & molli iam pridem crimina Mosco  
 Sacrarunt titulos, populiq; trahuntur in ore.  
 Improba gens, multisq; tumultibus acta superbum  
 Pectus, & enormi metuenda cupidinis usu:

Crudelis,



ECLOGA. I.

Crudelis, funesta, ferox, licet impetus iras  
Promouet: at timidis alioquin concita plantis,  
Et studiosa fugæ celeres præit æmula uentos.  
Phædrius at syluas tantum dulcesq; paludes  
Sollicitat: neq; enim stolidæ commercia gentis,  
Russorum tumulis, & dira querit arena:  
Hic nihil ingenio labis, nil criminis æuo  
Contrahitur: pecudes studium est & cura tueri,  
Perq; uagos Scythiæ fluuios uiridesq; recessus  
Aruorum, & multi per summa cacumina montis,  
Pascua barbigeris inquirere lata capellis.

Mœ. Ergo mihi quodam discessus honore uidetur  
Illius augeri, nec ducere tristia posse.

Da. Rem memoras: alio non æquè gloria flexu  
Vatibus, ingrato certantibus æquore remos,  
Contigerit: facili quàm si subducere riuo  
Et pecudes properent, & se coniungere ductis.  
Istinc cùm redeat, tùm demum rure beato  
Florentem uideas, armenta q; pinguia mitti.  
Tùm capras, ouiumq; greges, matresq; gemellis  
Fecundas cernes, & grandia nectare spectes  
Vbera, uillosis non peruia clunibus esse.

Mœ. Tùm uerò incipiet nitidos fortasse iuuenos,  
Et laudare boues, ueteri qui cuncta ueneno

Iam

D A M O N

Iam solet, ac diro pulcherrima rodere morsu.

Da. Codrum ais, ac dubio uultum qui lumine uersat  
Lumbricus, aspectu fæta truculentior ursa ?

Mœ. Hos equidem Damon, quanq̄ nō dixero solos (get  
Hosce etiam : multos namq; assecla Lumbricus ur=  
Huc secum, & Codro suffragia scribit inani.

Da. Inuideat quemcunq; iuuet : pectusq; perurat  
Tristicia, & tacitis laceret præcordia flammis:  
Dum tamen et laudet Scythico quòd pinguius orbe  
Phædrius armentum non tristi sorte reducet.

” Inuidiæ facies solis autoribus una est

” Exitiosa suis : alijs uia prompta saluti

” Creditur, & fructu iactatos explicat ignes.

Mœ. Interea longum fuerit fortassis amico  
Hoc caruisse : etenim quis uel sua carmina uates  
Hic canet, & nostras recreet dulcedine mentes :  
Vel duras fallet productis uersibus horas ?

Da. Ne tam sollicitis obtundas pectora dictis:  
Et iam multa tuus cecinit tibi, plurima nobis  
Mox canet, è Scythico cum Phædrius orbe reuersus  
Pressius instanti potietur Apolline uictor.

Mœ. An nostris igitur quid barbara uersibus ora  
Conferet, an carmen melius canet, aggere uates  
Si Neogardiaco, ac Scythicis indormiat aruis ?

Certè

ECLOGA. I.

Da. Certè equidè melius: Quid enim tu Mœri poëtas  
 Hos laudare soles, denso qui maxima uersu  
 Argumenta ferunt, quos tanti muneris autor  
 Cynthius, afflauit Parnasi è culmine montis?  
 Res etiam noster uariasq; bonasq; uidebit  
 In syluis passim, lato dum colle uagatus  
 Aequora conspiciet Scythico confinia luco:  
 Inspersas lustrabit aquas, fluuijsq; natabit  
 Sæpius, & latis armentum saltibus abdet.  
 Arboreo discet Sobolinam è uertice pellem  
 Dissicere, intensos laxareq; funibus arcus:  
 Mustelæq; genus niueum, Martesq; sonoros,  
 Et sparsas corpus maculoso tegmine Lynces  
 Inuenit, ac sæuis ludentes cornibus Vros.  
 Deniq; non facile est, fuerit uox ferrea, centum  
 Seu fuerint linguæ, species memorare ferarum  
 Multiplices, numero quæ non constante uagantur  
 Saltibus, & toto Moscorum limite regnant.  
 Ergo ubi tam grandi peragrato Phædrius orbe  
 Huc redit, & multis naturæ partibus acri  
 Perspectis studio, populorum iura situsq;  
 Calleat, & mores solerti pectore narret:  
 Quale putas carmen nobis tum condere uatem  
 Posse tuum, quantoq; animos suspendere quæstu?  
 Certè

## DAMON

*Certè equidem totas gregibus captantibus umbras  
Luserit ille dies, ac nos recreabit in antris:  
Primus & hoc nostro celebrabitur orbe Poëta,  
Qui caput intonsa redimitaq; tempora lauro  
Cinget, & aeterno sacrabit pectora uersu.*

*Mœ. Ergò ego nunc animos genitu subduxero, nec me  
Conficiam lacrymis: foelix eat oro suaq;  
Fortuna magnus, pecudesq; per optima ducat  
Pascua, nec tristi repetat sua limina uultu.*

*Da. Et nos, quod struxi mihi nuper Mœeri, sacellum  
Hoc subeamus, iterq; Dijs mandemus, & aras  
Hij cineres spargent, atq; imbuet hostia nostras.*

## ECLOGA SECUNDA, PIRAMVS.

*PIRAMVS, LYCIDAS.*

**T**hespiades Musæ, quarum celeberrima toto  
Fama uiget latio, nostrumq; nitescit in orbẽ:  
Quæq; sacras Heliconis aquas, montesq; soletis  
Pierios habitare, ducesq; & maxima Regum  
Nomina,

ECLOGA II.

Nomina sidereo transmittere uersibus axi,  
 Dicite pastores etiam, carmenq; mouete,  
 Quod Lycidæ quondam cecinit meus acre sodali  
 Piramus: ut aulci profudit gutture uersus  
 Aethereos, gemituq; malum deplorat oborto,  
 Omnia quod miseris correpta laboribus urget.  
 Dicite, forsitan enim non parua hæc commoda secum  
 Cura feret: seros poterit uel adire Nepotes,  
 Nostra uel hæc grauibus monuisse mapalia dictis.  
 Pastores nonnunquam etiam sunt recta loquuti:  
 Quamuis turba sitim liquidis sedauerit undis,  
 Et rigida indormiscat humo, furnaq; prementem  
 Sæpè famem subigat gleba, uincatq; moreto.

Depulsos igitur Lycidas cum saltibus hircos  
 Conderet, & primo cum sole reduceret agnos:  
 Piramus in campis, ubi nullam Cynthius umbram  
 Ilicis obiectæ nodoso è robore fudit,  
 Consedit patulis: medioq; hærebat in aestu  
 Sollicitus, mentemq; dolens atq; anxius æuum.  
 Hunc Lycidas, syluis cum fortè ex more rediret,  
 Adiunctum gregibus deserta per arua salutat:  
 Ille quidem Lycidam contraq; agnouit, & ipsum  
 Talibus excepit, nitentem corpora, dictis,

Pi. Annè etiam Lycida caper est tibi saluus & hædi,  
 Letaq;

D A M O N

Lætâq; per cliuos tondent dumeta iuueni ?

**Ly.** Integra sunt equidem pastor mihi nostra: iuueni  
 Pinguia sub molli perceptant pabula cliuo,  
 Saxea qua ramis grandescit mitibus umbra.  
 Tu uerò campos, & aperti lumina Solis  
 Semper amas, radijsq; probas diffundier arua,  
 Cynthius ardenti rapidos temone uolando  
 Quos iacit, & tepida suffundit gramina luce.

**Pi.** O pecus infœlix nimium, cui nulla subinde  
 Procubet umbra locis, nec humũ defendat ab æstu:  
 At fato contrà ductum meliore, uirente s  
 Suppeditat cui sylua comas, frondesq; suauis  
 Diffundit corili, densoq; alit inuia musco.  
 Hic olidæ faciles statuit natura capellæ  
 Decreuitq; uias, syluasque habitare patentes  
 Iussit, & umbroso pinguescere corpora libro.  
 Nec capreis tantum, pecori sed & arbor equino  
 Confertiq; iugis luci, nemorumq; recessus  
 Profuerint, quacunque domos non fixerit œstrum,  
 Nec grauidas uolucris matres tremefecerit ictu.  
 Ardua quapropter tua pastor ouilia plenis  
 Luxuriant gregibus turmisq; & laude redundât:  
 Nostra sed hæc sterili flaccescunt pascua iunco,  
 Armentisq; ferunt sub iniquo gramine pastum.

Vlla

ECLOGA II.

Vlla nec umbra tegit pecudes, cum concita Sole  
 Corpora feruenti sequimur, ripisq; locamus  
 Armentum, & tenui deducimus æquore uaccas.  
 Interea securus agit sub robore Taurus  
 Populeo, cytisumq; legit, molliq; recumbit  
 Tutus humo, plauditq; sonans ludentibus inter  
 Quercetum bubus, terretq; fragore iuuenos. (quis  
 Quin nonnunq; etiam, nemorum dum lenta relin-  
 Gramina, nec sæuo ferit athera Cynthius igne:  
 Et syluis agitare pecus: campoq; uirenti  
 Fundere nulla tibi Lycida fortuna negauit.  
 Quare fœlicem meritò te nostra uocarint  
 Rura senem: neq; n. numero te æquauerit alter  
 Lanigeræ pecudis, simili neq; pascua fructu  
 Aucta tenet, syluisq; gregi potiatur & aruis.

Ly. Ista relata Deo sint ocia Pirame: namq;  
 Hic mihi semper erit læto Deus: illius aram  
 Sæpe quidem nostris ab ouilibus imbuet, alto  
 Victima coesa loco, precibusq; subibit olympum.

Pi. At quem tute Deum narras? cuiq; ocia diuo  
 Hæc tua detuleris? patrios anné ipsus agellos  
 Hic colis, & proprias captant armenta myricas?

Ly. Sanè equidem proprias o Pirame: Si tamen ulli  
 Fas proprium statuisse, q̄ actum clade Tyrannis

B

Conficit

PIRAMVS

Conficit, aut aliqua demum ratione fatigat  
 Insidijsue petit, seu ui damnauerit hosti:  
 Mi uerò sunt diui etiam, qui iura Tonantis  
 Expediunt superi, statuuntq; laboribus urbes:  
 Inuigilantq; uirum studijs, rectosq; tuentur  
 Affliguntq; malos, & publica legibus ornant.  
 Deniq; qui pecudes etiam tardosq; bubulcos,  
 Haud aspernati seruilia corpora, curant:  
 Obuallant patres despecta mapalia: nec nos  
 Esse sinunt prædas Lapythis, Cyclopibus escas.  
 Postremò census etiam quibus annua iusti  
 Debita, pastores studium est deposcere: quiq;  
 Insolitis non rura grauant, miserosq; fatigant  
 Ponderibus: ueteri sed prædia iure gubernant  
 Defensasq; suis præstant uirtutibus urbes.  
 Annè tibi pastor Domino seruire potenti  
 Contigit: insano cui nec Busiridis aræ  
 Certarint, Scythicis neq; Tamburlanus in armis,  
 Qui belli scelus & tristissima Principis arma  
 Intulit humano generi: passimq; uagatus  
 Versicolor, populatur agros abigitque capellas  
 Sacraque turbatis funestat templa colonis.  
 Libera quorsum igitur uestri possessio campi,  
 Concessit tandem? quis nunc tua Pirame nutu

Prata



ECLOGA II.

Prata suo exagitat : sylvasq; affligit opimas ?  
 Certè equidem ille, boues olim qui & pascua macri  
 Cum primis possedit agro, tenuiq; coëgit  
 Valle gregem, & breuibus conclusit ouilia septis :  
 Nunc uerò sceleratus opes sublegit, & arua  
 Fœnore multiptci, uarioq; habet improbus astu,  
 Pastorum manifesta lues certumq; colonis  
 Exitium, & toruo prospirans lumine mortes.

- » Quapropter Deus ille mihi, ceu lege, colatur,
- » Qui patrios defendit agros, lucosq; tuetur
- » Aruaq;, nec pretio pecudes inscribit inani.

Pi. Euenit Lycida, quod longa oracula Diuûm  
 Prædixisse ferunt, populoq; sacrasse uetusto :  
 Subuersum spectent uiridi cum ualle lapillum,  
 Despectum agricolas auctumq; laboribus iri.

Ly. An prædictum etiam ? qua ualle, qbusq; sub oris ?  
 Pirame, ne graue sit nos hæc docuisse, sacrosq;  
 Enucleasse Deûm, celataq; fœdera, ritus.

Pi. Si libet hoc Lycida mecum paulisper in antro  
 Consedisse : uides ut fornice tecta recuruo  
 Ducta sient, pluuias contra, uentosq; ruentes  
 Ac æstus, medio quos cardine Cynthius altis  
 Eiaculatur equis, rapidumq; è naribus ignem  
 Proflat, & interdum radijs loca nostra fatigat,

B 2

Scilicet

PIRAMVS

Scilicet aestiuo quoties ille altior orbe  
 Inuehitur, rectoq; ferit terrestria uultu.  
 Nunc uerò flatus prohibet nimbisq; resistit,  
 Et mihi nonnunq̄ defesso pectora mulcet,  
 Cantatum cum fortè refert resonabilis Echo  
 Carmen, & incluso geminantur murmure uersus,  
 Versus, longa quibus falluntur tempora, cum se  
 Prata per effundunt pecudes, & gramina sicco  
 Guttore macra legunt, aruoq; feruntur inani.  
 At succede antro, mecumq; quiesce sub umbra,  
 Si uacat : optatum referes, & carmina pandam  
 Quae solitus recitare olim dum pascua Myrmix  
 Vicinis captabat agris, camposq; colebat  
 Hos etiam, & nostro ludentes monte capellas  
 Spectabat uates, uenturaq; plurima dixit.

**Ly.** Et uacat ô pastor : uel si meus ista negaret  
 Qui uel cunq; labor non fictis ocia curis :  
 Post tamen hijs habeam mea seria uersibus : Et te  
 Siue canentem ultrò, ueterum seu dicta ferentem,  
 Fas audisse bonum, priscoq; attendere mundo.  
 Delitiæ nostris tu Pirame solus in aruis,  
 Omnia cantando qui tempora fallis, agrosq;  
 Hæc tua disparili solatur fistula uersu.

**Pi.** Haud mihi sunt propriae faciles in carmina uires:  
 Sed

ECLOGA II.

Sed duram ingenio Musæq; Deusq; palestram  
 Exercent nostro, feriuntq; laboribus auras  
 Sæpe leues, tenuiq; usu mea labra resoluunt.  
 Hoc solum est, quo me Phœbus præstare Venusq;  
 Exiguo uoluerè Dij, qui uiribus addunt  
 Ingenium, & iuncto confirmant fata Tonante:  
 Ut quæ gesta alijs, facili meminisse labore  
 Sufficiam, uobisq; bonis, si forsitan usu  
 Eueniat, studio narrata reducere possim.

**Ly.** Ast hoc magnum etiam pastor, ne tute proteruè  
 Extenues, paruiq; feras, quæ maxima nostri  
 Agricola censent: teq; hac uirtute beatum  
 Rura colunt, animiq; bonum & tua dona celebrât:  
 Sed sacrata Deûm quæ sunt oracula, nobis  
 Expedias promptus, lapidemq; locumq; sonosq;  
 Fatidicos: si fortè sonos carmenq; Tonantem  
 Hoc statuuisse putem, nec opinio fallat inanis.

**Pi.** Rerum longa quidem series, & mira relatu  
 Pertexenda foret, primos ab origine cursus  
 Si repetam, sacrasq; Deûm memoraro tabellas,  
 Omnia sunt nostri quibus obsignata laboris  
 Tempora, deciduis quæ tandem euentibus urgent  
 Cælica iussa, premuntq; dies præsentia nostros.  
 Sed per summa ferar, solitus quæ carmina Myrmix

## PIRAMVS

Decantare senex, sterili cum cespite durum  
 Pasceret armentum, qui pabula multa quotannis  
 Conuexit stabulis, uarioq; ea condidit aruo.  
 Diues enim pecoris Myrmix & lactis abundans  
 Noster erat, semperq; greges foetura benignos,  
 Lanigeras suppleuit oues, numeroq; capellas  
 Auxit, & oppleto duplicauit ouilia partu.  
 Et tum prata quidem tenuari cepta, simulque  
 Aspera seruitio pastorum uita subilat:  
 Dynaste cum passa iugum, tolerare potentis  
 Arbitrium Domini, funestaque carpere iussa  
 Militis externi, & nutum obseruare coacta est.  
 Tum plorare uices multi, totosq; querelis  
 Exegere dies, palmasq; in sidera iactant,  
 Excruciantq; animum, & lacrymis testatur olyn=  
 Accisis etenim dapibus tum ferre diurnos, (pum :  
 Pastores iussi, medioq; in sole labores  
 Exantlare graues totoq; perurier aestu :  
 Cum neq; quò murem quis pasceret, aspera panem  
 Curia largita est, neq; mixtam fursure uappam  
 Sponte dat, aut tenui releuat fera pondera zytho.  
 Interea deserti etiam, campisq; uagati  
 Errauere boues ieiunaque gramina tondent,  
 Qua uel cunq; ferunt pedibus uestigia pressis.  
Deniq;

ECLOGA II.

Deniq; quæ seruat commissos nuda penates,  
 Orca solum Pholoë, genio submixa maligno  
 Ac inopi, duramquæ famem perferre sitimquæ  
 Sueta, sedet spectatq; focum uersatquæ fauillas  
 Ardua ploratus, uacuaquæ quiritat in aula:  
 Cum misera ambesas sobolem consumere mensas  
 Cogit, & ingluuiem tenui suspendere Dauco.  
 Hæc igitur, quoties pastorum turba sub antris  
 Consedit nostris, haud rarò dura solebat  
 fata queri, miseramquæ Dijs euoluere sortem.

Tempus erat, quo Phœbus equos feruentior alto  
 Solstitio quateret, Geminis ubi uertere cursus  
 Assolet, & superi fugissè uolumina mundi:  
 Venerat huc Myrmix Corydonq;, & Phædrius illo  
 Tempore penè puer, similisquæ parentibus ora  
 Et flauos crines, & membra dicata iuuentæ:  
 Conseditquæ simul, blandosquæ ferebat ocellos,  
 Hos circum, & nostri miratus fornicis arcus,  
 En medijs, inquit, campis constructa uideri  
 Tecta etiam, quibus alma quies pastoribus olim  
 Defessis plaudet, nimioquæ tuetur ab æstu?  
 At nos haud quicquam nostris molimur in aruis  
 Tale quidem: caput ast liquido submittimus igni  
 Nostraquæ Phæbeio torremus corpora morsu.



PIRAMVS

Quin tempestates rigidiq; pericula coeli,  
 Pleiadasq; Hyadasq; graues Taurumq; madentem  
 Cogimur eduris perferre laboribus, imbres  
 Qua uentus pellit, stipulasq; uolutat inanes.  
 Et tu docte iocos, inquam, cultissime Phædri,  
 Rustica mirari potes hæc mea culmina, quæ nunc  
 Pulcra quidem pueris etiam, senibusq; feruntur?  
 At formose puer, patrij si ruris agellos  
 Ipse tui quondam, diductaq; uimina campis  
 Integra spectasses, uastis ubi molibus altos  
 Rudera traxerunt lapsus, cumulantq; ruinas:  
 Rectius ista quidem miratus teæta fuisses,  
 Pulchra quod, & uarijs substructa laboribus esset.  
 Nunc uerò ista quidem sunt diruta saxa, iacentq;  
 Congesti cineres, & humum fastigia lambunt,  
 Artificis scelere insani, dominiq; potentis  
 Arbitrio. Sed tu puer, o castissime, longis  
 Fletibus abstineas, patrioq; decore beatas  
 Virtutes sequere, ac uestigia semper adora.  
 Ipse tibi numero pecudes, atq; usibus arua  
 Forsitan aucta suis alio donabit in orbe  
 Noster Apollo: uel hijs etiam duplicabit in agris  
 Multipliciq; greges foetura & sorte beabit.  
 Tum tu rursus humo ueteris prudentior antri

Rellia

ECLOGA II.

Reliquias tuleris, tabulataq; sparsa repones  
 Antiquos super acta pedes, firmasq; columnas  
 Inicias patriæ, uelut aurea culmina terræ,  
 Ornabisq; strijs, & concamerata relinques.  
 Sors hæc nostra quidem puer est, ut multa feramus  
 Et genijs aduersa bonis, & iniqua suauis  
 Agrorum uitæ, pecoriq; grauissima nostro.

Hic uerò accensus uocemq; & pectora Myrmix,  
 Ut pueri lachrimis commotus penè fuisset,  
 Dispulit ingenio luctus, animumq; serenum  
 Induit, ac tali gemitus sermone leuauit:  
 Desine, chare puer, dulcissima fletibus ora  
 Conturbare, genasq; arcto perfundere rore.  
 Virtutis patriæ fortunam uidimus, & te  
 Solatur dubiæ, communis & aspera uitæ  
 Alea: nec magnis parcat sors dura Monarchis.  
 Omnia Centauri, furijs dum turba feratur  
 Impia succensis, mentemq; ea terret imago  
 Patrati sceleris, tedaq; ardente lacescit,  
 Peruolitant loca, consilijsq; tumentibus urbes  
 Sæui corripiunt, tum rustica limina raptant  
 Affliguntq; malo, & quæ struximus antra reuel=  
 Deiciuntq; solo, merguntq; cruore penates. Clunt  
 Hanc nos experti sortemq; & fata, dolosq;



## PIRAMVS

Pertulimus Phædri, patiendoque uicimus istam  
Fortunæ rabiem cautaque elusimus arte:  
Quantum nec studijs poteram neque fretus amicis,  
Effugere humanam quæ turbant nubila sortem.  
Finibus hijs equidem nostris, mihi Piramus iste  
Solus habet minimis tentatum cladibus antrum:  
Quod uel amor Superum, uel labi nescia Virtus  
Sustinuit, tantos inter fremitusque dolosque,  
Nostra quibus miserè turbata laboribus ardent.  
Haud secura malis fuerant Diademata: regni  
Culmina tentauit Nemesis, ludibria sparsit  
Magnatum generi, strauitque doloribus aulas.  
Hanc igitur patriæ sortem uirtutis, & ipse  
Constanter placideque feras: & grandior æuo  
Quas uel cunq; uices, alios ita ferre doceto.  
Denique pastores Phædri, ne forsitan erres  
Dum te prima fugit tantorum causa malorum,  
Tristia multa quidem miseros tolerare necesse est:  
Sic etenim Diuum monitus, & prodita multis  
Fata canunt, trepidisque ferunt oracula dictis.  
Hæc Myrmix, cœlumque tuens suspexit, & altè  
Ingemuit bonus, ac puerum complexus inhaesit.  
Tum uerò Corydon, quæ tu paulò ante, rogabat  
O Lycida, tetigitque genas, hortatus ut illas  
Diuorum



## ECLOGA II.

Diuorum ambages, responsaq; mersa tenebris  
Explicit, ac timidis referat sua fata colonis.

Interea sedenim dum nos successimus antro  
En teneros errare boues, armenta q; pratis  
Fundier, & longè uestigia ferre capellas:  
Cogimur adductum discedere, tute moratus  
Confidas tectis, recreetq; hæc fistula mentent.

**Ly.** Imo age, iam medio stat feruentissimus orbe  
Phœbus Apollo, solumq; æstu rapidissimus urget:  
Forsitan & fluuios repetit pecus, & meus alto  
Nescio quid syluis contendit murmure Taurus,  
Ac nostras uideo lustrare palustria uaccas:  
Istuc concedam, Myrmicis cætera nobis  
Cras relulisse uelis ac prodere dicta coloni:  
Tum sacros aperire sonos, quibus illa latebris  
Eruta sunt nostri uentura pericula mundi.

**Pi.** Perficiam Lycida, seu te lux crastina nobis  
Huc referat, uestras seu nos ueniemus in oras:  
Dulcibus exundant tua namq; liquoribus arua:  
Nec raro fluuijs mersare salubribus agnos  
Rura solent, uestris liquido qui gurgite campis  
Exundant, gratasq; uehunt pastoribus undas:  
Et nunc tute boues, feriunt mugitibus auras  
Inuises celer, & tetricas age comprime lites.

Ecloga

# ECLOGA TERTIA, IVSTVS.

## IVSTVS, THYRSIS.

**P**astorum Musam Iustiq; & Thyrsidis, equo  
Certatam studio, lepidisq; relatibus auctam,  
Dicemus. Tu nostra, dijs accepte Melanthon  
Plectra moues, folijsq; animam uiresq; dicatis,  
Et placidus confers, & uotis ritè uocatus  
Agricolis, humilesq; casas & rura tueris.  
Haud omnes excelsa iuuant Elea, superbis  
Sape quidem pulsata iugis, ubi Dædala tellus  
Ardua præcipiti statuit certamina cursu,  
Et quinquennales palmæ dedit orbita ludos. (no  
Nec semper, quæ magna placent, grandiç; cothur=  
Scripta, Pelethronijs permixta laboribus ardent,  
Alcidæuè ferunt calamo spumante labores :  
Sape etiam extremas, despectaq; culmina, Diui  
Intrauere casas, latuitq; obscurus arenis  
Iuppiter hercæis, stagnisq; Tridentifer ætus  
Exercet ualidas gyrata per æquora uires.

Oble=

ĒCLOGA III.

Oblectant arbusta igitur, segnesq; myricæ,  
 Et conferre iocos, alternaq; condere dicta  
 Pastorum, liceat: molliq; retexere uersu,  
 Quam medias inter corylos, umbrasq; cadentes  
 Personuit facilem mihi rustica tibia Musam.

Scilicet excussis cum nubibus alta serenat  
 Cynthius ora Deus, liquidosq; per aëra uultus  
 Prodit, & immenso iam maximus incubat orbi:  
 Thyrsis oues, iustus distentas lacte capellas  
 Compulerant, lentiq; pedum posuere sub umbra,  
 Et studijs prope consimiles, usuq; canendi  
 Ingenijsq; pares, & respondere parati. (tro:  
 Cum Thyrsis prior, hoc quoniam consedimus an-  
 Fraxineas inter frondes segetemq; colurnam,  
 Tu calamis agitare manus, ego carmina doctus,  
 Cur operæ quicquam musis non condimus? olim  
 Hoc etiam nostri certamina pulchra Lyceo  
 Versibus extulerant: alternaq; dicta, Mineruæ  
 Sacrabant fano, circumq; altaria molles  
 Suspendere iocos, & carmine templa coronant.  
 Cernis adhuc medio in luco, qua Palladis alta  
 Tecta uirent, hederæ permixtas serpere lauros,  
 Et pastorales ornare ea pulpita lusus.

III. Vidimus ista quidem persæpe ô Thyrsi, solemus

Demi

I V S T V S

Demirari etiam ruris monumenta uetusti,  
 Pastorumq; iocos sacrataq; carmina Diuis.  
 Hoc certè, quanquam exiguo certaminis usu,  
 Nostrorum mores confecta q; tempora crebris  
 Ingenij neruis, & sparsa lepore uidemus.  
 Fistula dulce etenim cecinit pastoribus, hoc cum  
 Certantes tumulo, & meditati ludicra totos  
 Exegere dies, ac tædia longa fugarunt.  
 Nunc nostris turbatur agris, duroq; labore  
 Conficimur, totoq; furit mars improbus orbe.  
 Tantum igitur fremitus inter belliq; tumultus  
 Consistunt, multa luctantes arte Camœnæ:  
 Quantum perdurat Scyllanæ turba uolucris,  
 Dum miseris premit accipiter, prædamq; p̄ auras  
 Vestigans oculis, pedibus grassatur aduncis.  
 Aut plaudere solent quantum per tecta columbæ  
 Cum trepidis atrox rictu Iouis imminet ales  
 Aeriosq; secat tractus, aut culmina templis (stat:  
 Summa ferit, terretq; umbra, & pauitantibus in=  
 Haud tamen ingenijs parcendum: dura labori est  
 Obijcienda suo posita tolerantia palmæ,  
 Dulceq; furtiuus carmen meditemur in horis,  
 Tempora sortiti calamis: diuosq; canamus,  
 Rustica fana, Palem, subitoq; palemona iactu

Emissura

ECLOGA III.

Emissum scopulis, & Dijs uada longa mouentem,  
 Panaq; Syluanumq; senem, Dryadasq; puellas  
 Loraq; Neptuni, & lituo Tritona sonoro:  
 Quiq; alij pecudes alimenta; dulcia nostris  
 In syluis curant, & ouilia partibus augent.  
 Sic etenim fatura gregem suppleuerit, & nos  
 Difficiles molli releuemus carmine sortes.  
 Alternis igitur, deamant alterna Camoena,  
 Tempora fallamus: rerum mea fistula longos  
 Mæsta fugit ductus, extensa; carmina damnat.  
 Tu saltem dic pastor, ouesne an rura canamus,  
 An Diuos etiam, mersasue paludibus alnos.

**Th.** Ista quidem claro iam personat omnia uersu  
 Venturisq; colit populis, seu Græcia tellus  
 Seu Latium, supero qua se uel ab æquore tangi  
 Prospicit, aut infra Thyrrenas lambit arenas.  
 Et fortasse Deos alias: nunc magna parentis  
 Naturæ secreta uelim: circumq; feramur  
 Terrarum tractus, & quæ miranda secundo  
 Carmine complexi, Musis sacranda locemus.

**iu.** Res placet: & nobis aliqua est quoq; gratia: Phæ  
 Hoc equidem solitus calamo triuisse labellum, (bus  
 Dùm puero prælusit, & hæc mihi tempora lauro  
 Cinxit, & artifici necebat uincula dextra.

Phæbus

I V S T V S.

**T**i Phœbus amat Lauros: nostro dū Laurus in horto  
 Frondibus insurgit, renouantq; cacumina bacchas,  
 Nec uersu Laurus, nec Phœbus honore carebit:  
 Rustica iamdudum quia me finxere Poetam  
 Numina, nec uili lustrabant mœnia thyrso  
 Bacchatì circum pastores: non tamen illis  
 Credulus esse uelim, neq; uatum lege teneri.

A Ioue principium Musis, huic seruiet unī  
 Littera prima Deo, condatq; trophæa Tonanti.  
 Mox mihi grata ferant faciles exordia Lauri,  
 Munus Apollineo digestaq; præmia uersu.  
 Quantum sidereos inter nitet aureus ignes  
 Cynthius, & rutilo Saturni lumina uultu  
 Exuperat, facibusq; premens Oriona mergit:  
 Arboreos tantum partus, syluasq; uirentes,  
 Lauriferum ante quidem cellit nemus, et sua fructus  
 Robora multiplici, sperataq; commoda fundit.  
 Hæc, alias sæuo cum dira tonitrua sternant  
 Fulmine, subuerso diffusas culmine stirpes,  
 Vna comis intacta uiret: nec Iupiter acri  
 Fixerit hanc radio, superoué necauerit igne.  
 Deniq; & hanc ueteres crepitantibus urere flāmis  
 Assueti posuere rogo, folijsq; uenena  
 Et magicos ritus sonitu explorare solebant.

Postremo

ECLOGA III.

Postremò cariem nec Laurus sentit, & altis  
 Plurima stipitibus durando secula uincit.  
 Hanc igitur Phœbo sacram diuisq; canentes,  
 Sæpius alterno referamus in ordine uersus,  
 Fœcundosq; greges, deuinctaq; tempora Lauro  
 Tibia nostra sonet, ueteresq; ornabit agellos.

II. Hæc eadem nobis baculum dedit arbor, eoq;  
 Per uarios uitæ casus tristisq; pericli  
 Herentes fessiq; , per obuia damna uenimus,  
 Ornati folijs longæuæ pectora Lauri.  
 Hanc equidem prompto celebramus Apolline, uires  
 Miramur tacitas, gratosq; stupescimus usus:  
 Nam populos inter iucundæ fœdera pacis  
 Explicat, & læto gestatur pignore Daphne.  
 Annua conficiunt Merulæ fastidia lauro,  
 Perdicesq; graues, pictæq; colore palumbes.  
 Deniq; & ingenij uires animumq; serenat  
 Phœbea uirtute, recens ubi nexa Triumphos  
 Versibus inducit, sperataq; premia reddit.  
 Rumor & in patrio modo cespite crescere Laurū  
 Has iuxta Corylos, molles ubi Regia lucos  
 Præsidium Musis, sacrataq; mœnia condit.  
 Quid quod & oraclis ductum, foelicibus illum  
 Nascier auspicijs, primo cui Laurea Vati

C Hæc

I V S T V S

Hæc noua continget, monumentaq; digna coronet.  
 Omnia quapropter cùm fors durissima uerset,  
 Et rotet alternos cœcati numinis orbes:  
 Quis coniectando dubios partitus honores  
 Fascibus hijs secludat oues ouiumq; Magistros?  
 Scis etenim pretij quantum mea Daphnis, & arui  
 Rettulit, optato dum Principe lecta colonos  
 Excitat, ac alacri confirmat pascua nutu.  
 Nos canimus syluas, & dulcia prædia uersu  
 Ornamus facili, Musisq; inducimus ornos:  
 Tu maiora quidem sequeris, qui prælia Regum  
 Claraq; moliris surgenti scripta cothurno.  
 Pastores igitur crebrò certemus, & omnes  
 Ingenij neruos, claros referamus in usus,  
 Multa quibus nostris accedant commoda rebus,  
 Ociâq; hæc sero commendent pulcra Nepoti.  
 Fata uiam inuenient, afflictis læta capellis  
 Pabula qua cumulent, gregibusq; salubria præstet.  
 Sed Thyrsi, hoc mirum est, quæ cœlica fulmina uim  
 Contemnuntq; Iouis, displofis nubibus ignes, (cunt  
 Illa tamen molli rubigine tacta, uirentes  
 Attenuare comas folijsq; inducere mortes:  
 Si segetes inter frondescit Laurus eodem  
 Correptas uitio, sanie tabescit inulta.

Th. Rubigo Lauros perimit; ceu uitibus addunt

Exitium



ECLOGA III.

Exitium coryli : folijs oleagina perdit  
 Robora quercetum, frugibusq; salicta mimantur.  
 Sancit amicitias rerum natura, sed illas  
 Inductis eadem nonnunquam litibus armat  
 Rursus, & obuerso contraria foedere pugnat.  
 Haud etenim tanta quicquam uirtute referri  
 Possit, & ingenti subnixum robore duci,  
 Alterius cui non substantia tota repugnat,  
 Aduersasq; operas tacita ratione suburget.  
 Conspectum fului memorant trepidare Leonis  
 Quas uel cunq; feras, primosq; horrescere gressus  
 Attamen hunc etiam, non turpi uoce uolucris  
 Terret, & indomito confundit pectora Gallus.  
 Respuit incudes Adamas, superatq; ferendo  
 Malleolos, damnatq; ignes, Vulcania regna :  
 Hircino sedenim concedit magna cruori  
 Robora, & euersas hoc perdit acumine uires.  
 Egregium naturæ opus & sublime ferendum  
 Usibus exceptum magnis, Magnesq; uetustis  
 Dictus auis, quo cœli apices terræq; meatus  
 Longaq; signatis explorant limina uentis :  
 Hic ferrum calybemq; trahit, ceu succina molles  
 Delambunt paleas, glumisq; sequacibus errant :  
 Attamen has frangit uirtus Adamantina uires

Subdita Magneti, qui iuncto pressus ab hoste  
Languet, & innatos nulla ui promouet ignes.

III. Huic etiam referunt Magneti perdidit omnes  
Sæpe facultates, nulloq; extendier actu:  
Ut neq; suspensam nebulis monstrauerit ursam,  
Vicinisq; polo distinxerit æthera stellis:  
Nec ferrum trahat, aut medio prolectet ab auro:  
Quem priscos demum effectus, uiresq; sepultas  
Sic summpsisse ferunt, si pellibus iste caprimis  
Languidus abdatur, morsuq; fricetur odoro.  
Nonne uides quanto sociantur uitibus ulmi  
Officio? teneras quam molli fœdere plantas  
Excipiunt, ramisq; leuant, sparguntq; racemos,  
Et uelut amplexu surgentes ferre corymbos?  
At Baccho infestum si quis submittat Iulum  
Ordinibusq; serat corylos, miscetq; Lyæo:  
Vitibus exitium tulerit, uultusq; uirentes  
Pampineasq; comas aduersis obruet umbris.

Th. An te mira latent diuersæ semina terræ  
Naturæuē ferentis opus, uarijque labores?  
» Omnibus haud eadem est tellus fœcunda: Taburni  
Frondebis inuoluunt oleæ, iuxtaq; comatas  
Prospiciunt tremulis agitari flatibus ornos.  
At segetes plano melius, ceu dulce legumen,

Proue

ECLOGA III.

Proueniunt : circum tenerescit flumina lotos  
 Ac salices , umbramq; datura paludibus arbor  
 Populus, Herculeæ testisq; decusq; corona.  
 Sicca pyrus quercusq; petunt , ubi limpida circum  
 Flumina uoluuntur, dulciq; aspergine tellus  
 Exuperat, funditq; solo nemus arbuta putri.  
 Vitibus Ismarij montes campiq; falerni  
 Indulgent, acinisq; tumet Vindemia pressis.  
 Tùm fluijs Myrtus, crassisq; paludibus alni  
 Latius insurgunt, molliq; in littore gaudent.  
 Deniq; nulla locis ferre omnibus omnia tellus  
 Possit , & alterius non altera concipit usus.  
 Ut Veneri Myrtus sacra est : ita plurima soli  
 Europæ soboles, sed quam nec Iberica diti  
 Regna ferunt aruo, nec qua Mæotidis altas  
 Tangit aquas, Scythico cõtermina Thracia ponto :  
 Non Celtæ , non Cimbriaco gens ardua regno,  
 Nec premit Illyrios qua Græcia iuncta recessus  
 Aut fouet inclusos Germania lata penates :  
 At fœlix Latium , & tellus quam diuite gleba  
 Oenotrij coluere uiri , quæ tracta profundo  
 Hesperia excurrit diuisa per æquora, Myrtum  
 Consertam tantum productaq; robora fundit.  
 Sic Afri quondam Loton habuere , sed illa

I V S T V S

Lotophagis multum populis succreuit, & altos  
 Aegypti fructus commisso æquavit honore.  
 Dactylus Asiaco qui plurimus aggere crescit,  
 Grata Palæstinæ soboles perhibetur: & extra  
 Languescit Syrios, nec pendet ab arbore, campos:  
 Hæcquæ eadem, cum dives agris opulentaquæ fructu,  
 Trudit Idumeis stillantia Balsama ramis:  
 Balsama, Iudæis cælo confecta parente  
 Munera, & assiduis haud irrita pharmaca bellis.  
 India fert Hebenum: sunt thurea grana Sabæis,  
 Mollia longæui promittunt uellera Seres,  
 Arboribusquæ legunt depexam cortice lanam.  
 Serpentis morsus homini plerunque uenenum  
 Esse ferunt, minimoquæ dari sub uulnere mortem:  
 Ieiunus sedenim quicumque in colla saliuam  
 Anguibus excernat, tangatquæ ea corpora sputo:  
 Protinus aduerso naturæ pugnat ab usu,  
 Serpentiquæ necem celerat fatoquæ minatur.

Sed quid ego hæc tenui cõprehendere magna cicuta  
 Naturæ miracula uelim? Stupet obruta rerum  
 Ponderibus mens nostra, et guttura mole recondit.  
 Quamuis ista quidem numero sunt pauca, suisquæ  
 Viribus, & multo iam pridem cognita facto:

Cætera

ECLOGA III.

Cetera tu melius, calamos fugientia nostros  
 Iuste canas: equidem geminas tibi lætior aures  
 Apperiam, & magnis subiungam pectora dictis.  
 III. Multa quidem cecinit nobis tua fistula Thyrsi  
 Admiranda satis tacitæ monumenta parentis  
 Naturæ: Nos quædam obiter perteximus istis  
 Et narrata breui confecimus omnia uersu:  
 Hic modus ergo operi, nostrisq; laboribus esto.  
 Nam quis larga senex fœcundæ semina matris  
 Aut leuibus satagit calamis, aut ubere quamuis  
 Multipliciq; aucta studio, comprehendere Musa?  
 Quæ si scire uelis, atomos prius ipse uolantes,  
 Sparsaq; littoribus numeraris saxa, uel idem  
 Oceani captes librato pondere guttas.  
 Et scis Thyrsi meas, quibus hoc caput unda dolorq;  
 Impetit, ærumnas: uacuo ne in carmina possim  
 Esse animo, & numeris implere sonantibus aures.  
 Sed tamē haud fugiam, quin cū lux crastina læto  
 Sole iubar referat, nostrumq; nitescit in orbem:  
 Quæ iam tute rogas, cumulato carmine promptus  
 Naturæq; alijs penetralibus eruta, reddam.  
 Nunc cū tracta dies uerso declinet olympo  
 Præcipitiq; trahat Phœbus temone iugales,

CODRVS

*Cedamus, pecudesq; domum saturasq; capellas  
Balantumq; greges, ne rore premantur, agamus.*

E C L O G A  
Q V A R T A,  
C O D R V S.

C O D R V S, L V M B R I C V S.

*I*nfestas animi curas, atq; inuida Codri  
Pectora dicemus: quem sunt mirata furentem  
Balthica, qua tremulos propellunt æquora fluctus:  
Diffugere greges, summisq; in montibus ornos  
Inter, & eduras corylos, quercusq; uirentes  
Corpora tam fædo stupefacti carmine mergunt:  
Flumina constiterant, armenta q; fortia quamuis  
Horrebant uillis, & se subducere ripa.  
Has igitur Codri furias animiq; uenena,  
Omnia quæ diro promouit Lumbricus ausu,  
Dùm Phlegethonteo sua guttura digna Tyranno  
Mancipat, ac turpi consentit uanus amico:  
Dicemus, Tu plectra moue calamumq; Minerua  
O Phœbi soror, & studij pars maxima nostri,  
Pieriosq;

ECLOGA III.

Pieriosq; animo præsens affunde calores:  
 Ne mea frigus iners conuellat pectora, cum se  
 Prompta ferant, medios inter fluctusq; dolosq;  
 Et suffusa canant liuenti prata ueneno.

Certantes igitur postquam stupet Amphitrite,  
 Nec pisces tranare fretum meminere, nec hamos  
 Sublegere insidijs, & aduncos fallere casses:  
 Fluctibus attoniti stabant, aut mæsta profundis  
 Demersere uadis, figuntq; ea tergora saxo.  
 Quin uisæ celeres percurrere uincla carinæ,  
 Et sprete statione fugam tentare per undas,  
 Horrisonoq; freto miseram petijisse salutem:  
 23 Tantum Codrus alit simulato uirus in ore.

Quid? quòd et agrestes perstrinxerit halitus her=  
 Ac loca, Valbyacis quamuis in montibus acri (bas  
 Nitantur stipula, calamisq; tenacibus extent:  
 Aut nitidos etenim mutant afflata colores,  
 Aut tacta radice cadunt: ut uiuida morbo  
 Corpora tabescunt, subitisq; doloribus ardent:  
 Ceu cum sidereis stringuntur ab ignibus, alto  
 Nata solo, uiridesq; comas populantur edaci  
 Fulmina sæua manu, dirimuntq; tonitrua quercus.

Et iam primus equis fumantia pectora Phœbus  
 Soluerat, ac lato submittens lumina mundo,



## CODRVS

Ardua Cimbriacæ pulsabat culmina terræ:  
 Lumbricus assueto graciles cum more capellas  
 Exigeret stabulis, pinguiq; induceret aruo:  
 Aggeris ad rupti cumulos, ubi multa subinde  
 Defluit unda freto, stagnisq; liquentibus errat.  
 Pellentem uaccas Codrum, caprosq; petulcos  
 Conspicit, & tristi submittere lumina uultu.  
 Hic illum contra postquam uidet: ocyus orti  
 Lumbrice sit facies Solis tibi dixit, & aura  
 Hæc iucunda, gregiq; tuo latissima pastu.

Lu. Et tibi Codre boues, lentis pecus omne salictis  
 Mollia distento suffarciat ubera lacte.

Co. Lumbrice, nullæ equidẽ florescunt amplius herbæ  
 Montibus in nostris: Mars improbus omnia flāmis  
 Strinxit, & ardenti confecit Phœbus olympo.  
 Decliuu quapropter oues in ualle caperq;  
 Errat, & insolito uestigat pascua cursu.  
 Utq; suo petulans amisso buccula Tauro  
 Prata per, & rigidos saltus camposq; uagatur:  
 Sic ubi setigerum sus deperit horrida uerrem  
 Cùm calor in Venerem blandis pruritibus urget  
 Lataq; succiduis transcurrit odoribus arua:  
 Haud aliter grex errat agris, nec gramine ponit  
 Molle latus, sua nec placidæ dare crura quieti

Aut



ECLOGA IIII.

Aut queat, aut meminit. Sūt pabula leta profundo  
 Corpora quæ somno mergunt, curisq; resoluunt.  
 Hæc eadem pingues faciunt nitidosq; iuuenos,  
 Strictaq; spumoso tangentibus ilia conduunt  
 Sumine: Pastores eadem cantare, iocisq;  
 Indulgere bonos, tenerasq; salire capellas  
 Efficiunt: pingues ludunt in collibus agni,  
 Procurruntp; boues saturi, cornuq; minantur  
 Et fera multiplici decernunt pralia cursu.

Pabula sunt ô Pastor, oues quæ & corpora seruant  
 Armentum: seruata fouent, quæ fota salubri  
 Congressu Venerem foetuq; & prole secundant:  
 Macra stygem subeūt, herebiq; serūtur in umbras.

Lu. Hic fontes liquidi, & magalia leta bubulcis,  
 Confertiq; fluunt nostris regionibus amnes:  
 Hoc poteris mecum constrato uepribus antro  
 Pascentes spectare boues: dulcisq; susurri  
 Propter aquam, molles animis inducere somnos.  
 Aut tibi disparili connectere stramina cæra,  
 Inflatosq; agitare sonos, carmenq; foratis  
 Demulcere notis, & oues recreare canendo.

Co. Ite, meum nunc molle pecus: carpetis amaras  
 Hic salices, cytisumq; leuem, gemmasq; uirentis  
 Arbuti, & è summa tondetis arundine gramen.

Pinguis

CODRVS

Pinguius, & celeri uerbenam dente legetis.

Interea recubemus agris, iuxtaq; cadentes

Vndarum sonitus referamus in ocia corpus.

Dura fatigato cura est, fessisq; molesta

Artubus: at tenui prosternere membra cupresso

Dulce satis, lenesq; animo captare susurros.

Lu. At te quid lassum quereris? cum prima diei

Portio labatur, nec adhuc altissimus umbras

Frondebibus inducat gyrato Phœbus olympo?

Co. Lumbrice, pastorum multo genus acre labori

Nascitur: & dubios magno discrimine fructus

Inijcit ingenij curis, seruitq; fruendo,

Longaq; difficili sudore pericula uoluit.

Interdum morbis tabet pecus: utq; subindè.

Acer equus plenis lethum præsepibus haurit

Correptus flammis: nigroq; soluta ueneno

Colla ferit, gemituq; leues suspirat in auras:

Sic pecus interdum, stabulo non prorsus inani

Concidit, & mortem celato ducit ab igne.

Nonnunquam turpi scabie perfusa, misellam

Ægra quidem uitam retinent armenta, sed illam

Proluue foedam: fluidoq; natantia pure

Ulcera, mœsta trahunt: interdum sana bonisq;

Integra corporibus, cum pratis pascit opimis,

Luxuriant,

ECLOGA IIII.

Luxuriant, cornuq; petunt, & lusibus instant:  
 Sed quibus haud rarò succedunt seria: cum se  
 Taurus in aduersos sparsa confirmat arena,  
 Incenditque boues, & praelia sustinet ira.  
 Hinc transferre domum uaccas, quibus ilia longo  
 Singultu pulsata tremunt, lateque cruorem  
 Vulnera reiectant, genibusque innixa trahuntur:  
 Aut cornu Tauro excussum, dum fortia tota  
 Robora nituntur ceruice, pedemque prementi  
 Obiecere pedi, & releuant suffragine corpus.  
 Interdum cæno & prolapsa paludibus hærent,  
 Submerguntque dies puteis, æuoque resignant.  
 Nonnunquam fera perdit oues, stolidasque capellas  
 Seu lupa, seu Tygris, soboli cum fæta tenellæ  
 Pabula uenatur, tenerosq; inquirat in agnos.  
 Deniq; crudeli sunt quædam obnoxia furto  
 Et multis armenta uijs, multisq; teruntur  
 Insidijs: semperq; graui propiora feruntur  
 Esse malo, grandi quo maior ab ubere quæque  
 Vacca sit, & dulci submergit Cymbia lacte.  
 Postremò ut miseris aliud pastoribus esset  
 Nil graue, difficili neq; cætera uita labore  
 Pressa foret: tamen hos ita lata per arua ruentes  
 Consequier cursu, curisq; per inuia ferri,

Tedet,

CODRVS

Tedet, & ingrato fessos sudore molestat.

Lu. Codre recordari dulces quos pascua fructus  
Pastorum curis referunt, & prodere toto  
Te decet ingenio, condit quod ouile lucellum.

„ Ardua sollicitis sunt cuncta laboribus alto

„ lampridem firmata polo : placuisse uetustas

„ Hoc perhibet Diuis, & agros sudore teneri.

Pascere, moliri, traducere, ferre, locosq;

Explorare pedo, lacerumq; & corpora fractum

Deuincire, recensq; satas gestare capellas,

Tempora partiri, & multo foenilia pastu

Compleuisse, bonasq; ausu nutrire Lyciscas,

Maxima pastorum cura est: hac sedula nostram

Et diuturna premunt, reparantq; negocia uitam.

Sed non sola quidem, quæ sunt inscripta labori

Dicere fas : etiam quæ sunt uberrima quæstu

Virtus est memorare bonos: plerumq; proteruum

„ Hoc genus, in uulgus si quæ sunt aspera spargit :

„ Utile quodque tacet, fructusq; silentia mergunt.

Co. Lumbrice, non soliti fructus, non copia lactis

Expressi deinceps, nisi quid me fallat, in aruis

Laudari nostris, aut ducere commoda possit.

Lu. Omen id audaces comprehendat Codre, malosq;

Vallibus in nostris carpent dumeta iuueni:

Et

ECLOGA IIII.

Et sua repenti succrescant gramina riuo.

Co. Nec ualles deinceps uestri, nec prata ualebunt  
Et pecus, utilibus neq; fluctibus amnis inundet:  
Riuus & hic sonitu subter labetur inani.

Lu. Montibus è nostris decurrunt flumina, nullus  
Quæ siccare potis feruenti lumine Phœbus:  
Molliter hac somnos ducamus & o cia ripa.

Co. Excelsis aries qui cornibus anteit agnos  
Et caput elata sustollit in æthera fronte,  
Mox pingui macer & denso flaccescet in aruo.

Lu. Nil meus inuisum facibus grex curat amorem:  
Tempora sortitur Veneri, post foeta quiescunt  
Hijs armenta uadis, & pascua nota sequuntur.

Co. Lumbrice, tranquillo pecudes cum cespite pascas,  
Mollia sub uiridi meditaris carmina quercu  
Securus famæ iuuenum, quæ murmure passim  
Spargitur audaci, totisq; in saltibus errat.

Lu. Maxima saepe quidem mendax est fama, nec illam  
» Ut facerem magni, ueteres docuere parentes:  
» Plerunque effictis populi rumoribus auram  
» Captat, & impresso lacerarit seria rictu:  
» Sæpe etiam narrat ueraci falsa labello,  
» Et plusquam uolucris testatur Protea uultu.

Co. Per Solem, stygiamq; Hecaten, diuumq; Tonantē

Nulla

Nulla tuas uenit narrando fama per aures  
 Discessus Scythici, nec iter tibi dulce relatum  
 Phædrius Eoum quod noster obibit in orbem?

**Lu.** Auditum est, pastor: sed & hoc mihi Phædrius  
 Rettulit, ac longo reditum sermone notauit, (ipse  
 Hos etiam calamos assueta foramina Musis  
 Donat, & antiqui capias tibi, dixit, amoris  
 Hoc nostri pignus, facilesq; sodalibus opta  
 Ire uias, abituq; niues penetrare secundo,  
 Quàm latè campis intorta Boristhenis unda  
 Confluit, & Scythicis gremio luctatur arenis:  
 Accepi, seruoq; lubens, & uersibus orno.

**Co.** Tale tibi munus, quod amico Phædrius ore  
 Donat, & effuso decantat gramen ab usu,  
 Quale freto nymbi celeres, & maxima uentis  
 Seditio, cum larga salo incubuere tumentis  
 Flamina, commoto dum uastus Orion olympo  
 Aut premit, aut densat fluctus, sæuitque profundo  
 Thetis, & emisso grassatur Spiritus igne:  
 Pontigrada tremuere rates, medijsque tenebris  
 Hausta dies, liquidam mersit caligine lucem:  
 Soluitur uncta uadis abies, pronoque relictus  
 Nauita profundit gemebundus in æquore uitam.

**Lu.** Hostibus ista fiet cladésque & cantio nostris,

ECLOGA IIII.

- » Fas odisse malos : At amici munera nemo  
 » Damnarit bonus, & studio proscindat inani.  
 » Præstantes equidem turpe est incessere dictis,  
 » Quos sua fata beant, ducitq; per ardua uirtus.

Co. Lumbrice, Sidereos magni per Apollinis ignes,  
 Quid tua dicta ferunt? an ut hanc quoq; pessima  
 Semper alant, hac te donatum uoce putabis? (uocē  
 Nescio quæ non tetra tibi plerunque uideri  
 Grata solent: ut agris si quis spectauerit ortus  
 Herbarum uarios, rerumq; ignarus & usus  
 Confundat titulos, miscetq; operosa cicutis  
 Arbuta: ceu uiolis Narcissi nomina iungat  
 Proq; rosis digito uicina papauera monstret.  
 Haud secus arrident tibi Lumbrice cuncta probasq;  
 Quod uel cunque malo subnixum robore frondet.  
 Hucne igitur monitis deuenimus? anne perinde  
 Ut nullo anseribus lentescit plumula rore,  
 Irrita sic tecum præcepta salubria fructu  
 Tabescent: miseroq; premant tua pectora questus  
 Desine mirari, quæ nos culpamus & istam  
 Dum mutare locus iuueni, precor exue mentem.

Lu. Quid facerē? neq; enim quæ sunt bene facta, ma-  
 Obtrectare queam: nec me damnauero Diti. (ligne  
 Phædrius hîc magna pastorum laude, priores

D

Occupat

CODRVS

Occupat: & forsā merito celebratur honore.  
 Pascit enim pecudes bene: nec subduxerit alter  
 Tempora uel melius, uel ouilia rectius altis  
 Vallerit clatris, sudibusuē prāhendat acutis.  
 Deniq; nec simili properos nutrire molossos  
 Sedulitate potis: nec quisquam rura perinde  
 Veloci capit officio: si forsitan arua  
 Aut lupus insidijs armentaꝫ; læta fatigat,  
 Aut celeres falcem uindemia poscit in uuas.

Co. Cantando tu illum commendes Lumbrice, quē nos  
 Persequimur dictis, odioꝫ; patente grauamus?  
 Illius aut dextram tantum reuerere pedesꝫ;  
 Et quemcunquē oculi meditatur lumine nutum:  
 Aut genio subscribe meo, monitisꝫ; uetustis,  
 Nostraꝫ; tam facili præponas seria menti.  
 Haud commune feram quod tu tibi foedus in illo  
 Votaꝫ; constituis: socio lætabere Codro  
 Auspicijsꝫ; meis: tenues sine phædrius agnos  
 Pascat: & in leuibus conquirat pabula tesquis.

Lu. Sepe quidē hoc animi uirtus te Codre, queruntur  
 Pastores, uomuisse bonis: nec publica syluis  
 Fama latet: magnas etiam penetrauit in urbes  
 Fanaꝫ; diuorum tetigit, postesꝫ; superbos  
 Cesaris, & genio tali celebraris in aula:

Optarem



ECLOGA IIII.

Optarem melius precoriq; gregiq; tibiq;  
 Consultum foret, ac minus hoc mordere ueneno.  
 Co. Per superos, Herebiq; canes, faucesq; trisulcas  
 Infernasq; domos, & condita regna tenebris,  
 Quid tibi tu pastor quæris? aut guttura uulgi  
 Quid moror? inuisos habeant, quos ferre necesse est.  
 Sic usus mihi: fortunam uaga sidera nostram  
 Hoc posuere loco, mihi ne timuisse necessum  
 Impulsus fiet, aut cursus metuisse uolucres  
 Illius, ac lapsus faciles: nec protinus esse  
 Usq; uelis bonus, & populi rumore teneri.  
 Et fortasse malis aliqua est quoq; gratia: nonne  
 Mella uides dulci perfusa liquentia succo?  
 Nec stipata locis tamen omnibus ista recondunt  
 Agricola: nec apes nostris examina ducunt  
 Montibus, aut fauos uicino robore figunt.  
 Grata rosis facies, uiolisq; aspectus odoris:  
 Nonnunquam tamen & pueri mollesq; puellæ  
 Fraga legunt, nigrisq; petunt uaccinia ramis.  
 Deniq; nec semper, pretio quia carius, aurum  
 Expeditur: non raro etiam sunt ferrea magno  
 Vasa bono: calybemq; armis atq; æra requirunt.  
 Præstat enim læsisse bonos, quam recta tueri.  
 Quod ni tu facias: neq; consuetudine nostra,

D 2

Non

C O D R V S.

Non ope, non uotis, ueteri nec amore fruare.

**Lu.** Phædrius at meritum iam scandit culmen, & illū  
Deicere, insano tentauerit improbus ausu.  
Præcipuè in Scythiam cum pergat: ouesq; pecusq;  
Omne agat, & pingui statuat sub fronde capellas:  
Immergatq; greges fluuijs, & uellera denso  
Sole lauet, grataq; aries recubarit in umbra.

**Co.** Lumbrice, nil unquam sapis: at tu plumbeus esto  
Et stipes: quid enim conceptis fraudibus egi,  
Quàm retinere uias, Scyticosq; inhibere recessus:  
Ne sua Pleiscouijs armenta effundat in aruis  
Phædrius, ac denso distendat uiscera pastu?

**Lu.** Id uerò qua tute uia perfeceris? illum  
Namq; iter accinctū mox carpere rumor: et isthac  
Nocte canes crebris feriunt latratibus auras:  
Nunc abiisse reor, cursusq; urgere secundos.

**Co.** Imo age nequaquam discesserit ille, nec usq;  
Promouisse pedes potis, aut traxisse molossos.  
Hæc mihi iam dudum res est confecta: nec hoc se  
Phædrius ingenio retineri sentit & arte.

**Lu.** At quid tantopere studio contendis & astu  
Hos iuueni struxisse dolos, animoq; molesto  
Barbara fers geticis hunc quærere montibus arua?

**Co.** Dicam equidem: Scythiæ dulci pinguedine campi

Luxu

ECLOGA IIII.

Luxuriant pastor: fluuijsq; patentibus omnes  
 Perfusi, læta complent uligine ualles,  
 Et fœcunda solo prolestant gramina riui.  
 Pascua sunt hïc læta gregi querulisq; capellis,  
 Mitia grana locis, & prata uirentia musco.  
 Cur istuc igitur nostrum discedere nolim,  
 Res manifesta. Equidem meliori protinus aruo  
 Pasceret, & rigua pecudes in ualle locaret  
 Securus, lætaq; induceret ocia uitæ.  
 Põst Neogardiacò cum fonte reuersus in urbem  
 Hanc nostram, densis armenta reduceret aruis  
 Atq; solo stabulet patrio, camposq; priores  
 Hïc repetat, ueteriq; pecus diffundat agello:  
 Tum sordes equidem fuerint, quæ magna subinde  
 Montibus in nostris mirari dona solemus.  
 Ille boues secum pingues, taurosq; calenti  
 Sumine distentos referet, nitidasq; capellas:  
 Nostra sed hæc tenui, & macro subtegmine lucens  
 Transmittent armenta: uelut dare punica flammæ  
 Vulcano lucerna solet, cum accensa tenebras  
 Discutit, & clauso profundit lumina cornu.  
 Lumbrice, quid socijs patrio residentibus antro  
 Consilij tandem ac animi tum rere futurum?  
 Hæc mihi sunt igitur sic prospicienda, teneri

D 3

Phæa

CODRVS

Phædrius ut sterili nobiscum cespite possit,  
 Et glomerare solo pecudes tenuiq; maloq;  
 Glarea ubi, & macro flaccescant corpora pastu.  
 Deniq; consilijs etiam tu iuueris : istud  
 Profuerit siquidem nõ censu hunc crescere, pingues  
 Nec lustrare boues, nec oues tondere nitentes.

**Lu.** Codre tibi nostros æquum est parere labores:  
 Nam melius quæ recta uides, quodq; utile ruri  
 Ac gregibus fuerit, prudenti pectore uersas.  
 Et quanquam antiquo noster mihi iunctus ab usu  
 Phædrius, officium meritò contendere possit:  
 Hunc odisse tamen fas est, uinctumq; teneri  
 Fortuna, & duris ætatem cladibus angit.  
 Quod tu cunque iubes etenim fecisse necesse est.

**Co.** Ingenium laudo, pectusq; in nostra paratum  
 Commoda: Sed teneras iam sol altissimus herbas  
 Stringit, & in pecudes feruenti fulminat igne:  
 Surgamus, fluuiioq; boues statuamus & agnos.

Ecloga

ECLOGA  
 QVINTA,  
 MYRMIX.

PIRAMVS. LYCIDAS.

Ly. **Q**uo tã mane pedes? an Pirame tendis in urbẽ?  
 Tunẽ fidem nobis hesterna luce dedisti  
 Lanigeras huc te pecudes, hirtasq; capellas  
 Acturum, & nostris hausturum fontibus undas?  
 Commendare soles etenim mea flumina, dulci  
 Ante quidem cellant quòd grata liquore sitimq;  
 Promptius extinguant: saniemq; ac tetra salubri  
 Vlcera, purgatis subigant aspergine morbis.

Pi. Haud equidem inficias ueniam: sed rustica tute  
 Scis Lycida, duris oppressa laboribus esse  
 Fata: nec arbitrio decreta tripudia duci.  
 Mens mihi certa fuit uestris hoc tempus in oris  
 Exigere, & tecum ludentes uersibus horas  
 Fallere: me siquidem donaras ante cicuta



MYRMIX.

Hac tenui : quanquam neq; murmure garrit inani  
 Nec commissa fugit foecundi carminis arma.  
 Nunc ea uersa uides : hesterno barbarus igne  
 Miles adit, multa de nocte : iubetq; capellas  
 Has domino, quod nec bene uertat, ferre Tyranno.  
 Sed quo tu Lycida ? an nobiscum pergis in urbem  
 Ingressusq; uias miseris sociere colonis ?

Ly. Commune est ô pastor iter, dum nostra sacello  
 Hoc uia se bifido diffindat acumine: uerum  
 Quid gemitus trahis & moestus suspiria ducis?

Pi. Multa quidem subeunt animū multisq; recursant  
 Ordinibus curæ, misero dum pectore ductam  
 Agricolis sortem, scelerataq; plura recordor,  
 Nos quibus emungunt funestæ cladibus aulæ.  
 Contrà autem cum te spectem sacrosq; labores,  
 Intuearq; pedum, ueteris uestigia mundi :  
 Vix equidē lachrymas cohibent mea lumina iustas.  
 Nam uideo nostri quo dudum more parentes  
 Hijs uixere locis : cum scilicet alma beatos  
 Complexa est niuea Libertas fronte colonos.  
 Agricolas etenim non uis ea dura subegit,  
 Sed molli ductos studio parere iubebat  
 Imperium, & facili flexit quoscunque labello.  
 Annuus hîc census numero constabat & usu,

Nec

ECLOGA V.

Nec quid præterea domini exegere, nec agros  
 Mulctabant, nullo discussos iure Tyranni,  
 Tum sua Maiores soluebant uota Tonanti  
 Et precibus duplicare manus, cœlumq; tueri:  
 Quàm primum radijs etenim fax aurea Phœbi  
 Collustrauit humum, fuditq; per æquora lucem,  
 Diuorum lucos sacrataq; templa petebant,  
 Supplicibusq; onerant complexi altaria donis:  
 Mox ad opus uitæq; usus & aratra reuersi,  
 Languida multorum diuini membra fouebant  
 Mortales, faustisq; laboribus arua colebant.  
 Hæc equidem priscais fœlix & uita beata  
 Esse ferebatur: quæ uasta Tyrannidis arma  
 Haud experta, fœcis proprijs cultuq; Deorum  
 Lata fuit: cæsisq; epulata subinde iuuenis  
 Pignora nutribant: patriam quæ libera sortem  
 Legibus exciperent, & nomina longa referrent.  
 Cuius te uideam cum solum penè relictum  
 Fortunæ comitem, prostrataq; cladibus esse  
 Cætera, nec ueteri pastores iure teneri:  
 Multa quidem Lycida mentem perturbat imago,  
 Seu Libertatis prisca, mundiq; prioris:  
 Seu fati, quo nostra ruunt oppressa maligno,  
 Seu uenturæ etiam sortis diri q; pericli

D S

Quo



MYRMIX

Quo meritas statuent cœlestia numina poenas  
Vindiceq; oppressos, tam tristi è carcere, dextra  
Eripiet Nemesis, finemq; laboribus addet.

Ly. Pirame, nec gemitus uocesq; ignoro, nec ipse  
Diuersam mihi polliceor, mea tristia, sortem:  
Et iam nescio quid nonnunq̄ ex ilice cornix  
Garrula prædicit raucoq; immurmurat ore:  
Certè equidem tenues è toto corpore plumas  
Vellit, & audaci lacerat sua corpora morsu.  
Omnia quapropter sic sunt mihi nostra secundo  
Ingenio disposta, suisq; obuersa periclis:  
Ut cum difficiles, tristissima tempora, casus  
Permetuam, turbentq; futura negocia mentem:  
Quæ meliora tamen uotisq; ac fletibus optem,  
Deposcamq; deos fortunæ iura benignæ:  
Quod, quacumq; forent, fatoq; premente sequatur,  
Esse ferenda sciam: nec nostro murmure, diuum  
Siue uoluntatem, seu flecti numina posse:  
Aut fieri, ut gemitu miseris leuiora uideri  
Fata queant, si pastores collisa dolore  
Pectora conficiūt, lacrymisq; frequentibus augent.  
Arbitrio fortuna rotam quapropter & orbem  
Impellat licet, ac superum conturbet olympum,  
Si fas esse sinant instuendi iura tonantis:

Haud

Py.



ECLOGA V.

Haud equidem fera securos oppresserit:istos  
 iam dudum fluctus tempestatesq; uidemus.  
 Deniq; nulla quidem cautos inopina proteruē  
 Obruerint mala pastores:seu Maurus in ortum  
 Tela ferat: siue Hesperijs minitetur agellis  
 Casspia qui saeuo populus colit æquora ritu.  
 Hesterna nam tute die uentura canebas  
 Myrmicis quondam dictis excepta:futurum  
 Ut gens nostra graui sub pondere lassa prematur  
 Seruili uexata iugo:durosq; Tyrannos  
 Sustineat, sacris defensa parentibus olim.

At partem tantum referebas: optima Taurus  
 Interrupit,humum spargens & latius errans.  
 Illa quidē haud graue sit,mihi cōmemorare rogātī  
 Dum iuncti gradiamur: iter fortasse leuarit  
 Colloquium,& rigidos narratio molliet artus.

Py. Rectē equidē ô Lycida, pectusq; animūq; futuros  
 Obfirmas casus contra, durosq; labores:  
 Quos oracla quidem uenturæ præscia sortis  
 Ac sacri monitus,& rerum gnara uetustas,  
 Fatidicæ quercus,lapidiq; inscripta, canebant.  
 Illa igitur cum me iubeas memorare, molestē  
 Haud equidem officium tulerim: sed dicta beati  
 Myrmicis referam,& summa ceu cuspide tangam.

Quamuis

MYRMIX.

Quamuis ille etenim uarios recitare solebat  
 Euentus populis, obscuraq; multa tenebat  
 Antiquis immersa notis, uarioq; relatu  
 Explorata: equidem praesentis tempora belli  
 Limite distinxit, mutataq; regna secundis  
 Articulis partitus: in haec quoq; fixit ocellos  
 Crimina, quae patrias iam debachantur in urbes:  
 Singula nequaquam tamẽ ordine persequar: istud  
 Et fortasse foret longum nimis: & tibi curae  
 Hos tantum Lycida magnos nouisse labores  
 Vinculaq; dura, quibus tanti monumenta doloris,  
 Agricolis statuit superi sententia mundi.

Ergo ubi iam Corydon subtristi uoce rogasset,  
 Fatidicos ueterum calamos densasq; lituris  
 Annales Myrmix, oraclaq; prisca referret:  
 Ille equidem tali, non auersatus amicum,  
 Protinus exorsam decurrit pectine telam.

Quamq; arcana sient ueteris mihi plurima mū-  
 Cognita, pastores: teneamq; relata priori (di  
 Multa quidem seculo: quod me uel longa Senectus  
 Vel rerum series, & agris data copia nostris  
 Duxerit hos circum campos: portusq; marinos  
 Transierim, & uario lustrarim plurima cursu:  
 Haud tamẽ ulla magis memori mihi condita mente

Fixa

ECLOGA V.

Fixa manent, animis uè frequētius acta recurrunt:  
 Quā quæ tu Corydon, stupefactus corda, rogabas.  
 Has igitur rerum sortes, & arata figuris  
 Insolitis monumenta: animo cum maxima nostro  
 Querere cura foret: ductus sermone parentum  
 Ac fama (nostro constans quæ personat orbe,  
 Esse aliquid saxi & dura in rupe priori  
 Digestum seculo: uatumq; expressa stupendis  
 Carmina spiritibus: qui nostra pericula multo  
 Prospexere prius, quàm nos expleta dolemus  
 Omnia, fatidicis quæ prodita uersibus extant)  
 Ingressiq; uias, celebres tentauimus urbes,  
 Structaq; magnificis loca regia sumptibus, arces.  
 Sed quæ sita meo, Diuum secreta labori,  
 Nec poterant arces spectanda locare, nec urbes:  
 Donec responso tandem mea pectora quidam  
 Firmavit senior, tremulus maris accola nostri:  
 Nestoreos qui penè quidem iam uixerat annos,  
 Cornicisq; æuo cura certabat inani:  
 Multa equidem cui nota forent, quæ sparsa relatu  
 Multiplici, ueterum referebant gesta parentum.  
 Hic me sollicitum uarioq; errare recursu  
 Ut uidet, & longo Mæandrum uertere flexu:  
 Thesea præstabat, monitusq; iniecit eunti.

Ma

MYRMIX

Magna Deum Myrmix oracula quæris, & isto  
 Fine diu, uarij circum loca nominis erras  
 Fessus, & haud aliquo perdis tua tempora fructus:  
 Desine splendori superos committere. cælo  
 Iupiter elapsus, ueteris quod fabula mundi  
 Trita refert, postes nunquid petiisse superbos  
 Dicitur, & celsa latuisse benignus in aula?  
 Haud equidem: licet ille domos petiisset & aulas  
 Mille domos clausere seræ tectumq; negarunt:  
 Mille etiam struxere dolos, sataguntq; Tonantem  
 Fallere, & astuto cælum deludere risu.  
 Propterea quidam hospitioq; domoq; carentes  
 Rursus egent: pulsiq; colunt in saltibus æuum,  
 Haud raro auditi patrias ululare per urbes.  
 At pia Baucis anus, coniunctaq; corda, Philemon  
 Vicinis actum sannisq; & fraude Tonantem  
 Excipiunt, promptoq; fouent conamine Diuos,  
 Virtutis comites, & uera laude beati.  
 Ciuica non igitur tentes fastigia: nec tu  
 Exquiras stolidis responsa latentia tectis.  
 Rus pete, & Agricolis studio coniungere: rura  
 Quod petis, æqua dabunt, finemq; laboribus addēt.  
 Utq; minus fiet errandum mea pectora dicta  
 Conde tuo, ac animis aduerte monentibus aures.

Quam

ECLOGA V.

Quā tibi mōstrarint, Viridem cognomine uallē  
 Fata peragranti: totis ubi candida pennis  
 Exposuit ramo nidos, habitātq; sub umbris  
 Pica loquax, uariosq; sonos strepitusq; secunda  
 Garrulitate iacit, uacuóq; cacumine regnat:  
 Hic equidem Myrmix, longo quæsitā labore  
 Inuenies: cupidusq; tuis cumulabere uotis.  
 Dixerat ille, manúq; uelut lacrymantia tersit  
 Lumina: tum causas gemitus pressiq; doloris,  
 Cum calor exciret mentem, quæsisse: reclinat  
 Hispida colla thoro: nec dicta moratus, abito  
 Dixit, & ò nostræ Myrmix spes magna senectæ  
 Quæ monumenta ferent tanto tibi cognita Marte  
 Excerptas collecta, notisq; fidelibus hauri:  
 Hucq; refer, si fortè oculis mihi cernere fas sit,  
 Occultata diu magni decreta Tonantis,  
 Hanc prius excutiam quàm molem corporis, et nos  
 Criminis haud diri mens conscia iungat olympo.  
 Hinc mihi succreuit studiumq; & iusta uoluntas  
 Omnia scrutandi patriæ loca, rura lacusq;  
 Ac campos: si fortè aliqua mihi parte uirentes  
 Fata darent, niueaq; habitatas alite ualles.

Est locus eximio naturæ clarus honore,  
 Gramine uestitum prodens: ubi flexilis alto

Flis.

MYRMIX.

Flumine subiectas illabitur æquoris undas  
 Gudijs, & fluctu piscosas uoluit arenas:  
 Nobilis, & fundo diues, radijsq; benigni  
 Solis, & acclui confertus tegmina monte:  
 Quo nullus cælo melior pratissæ secundis,  
 Cimbrica quàm latè boreã prospectat & Austrũ  
 Chersonesus, & hesperia lauat æquora ripa,  
 Aut premit Eoo ditissima littora fluctu:  
 Vallis amœna, suisq; haud indiga rebus:at omnem  
 Copia diues alit præpingui uligine campum.  
 Cui neq; deliciae Graijs pulcerrima Tempe,  
 Iuncta nec Ausonijs certarint mœnia Baijs.  
 Hanc ubi confecto diuisa per æquora cursu  
 Transieram: Viridi dictam cognomine uallem  
 Perdidici, nomenq; uetus noua fama coronat.  
 Ingredior, tacitusq; pedem ac uestigia figo,  
 Et simul. O nostri ductorq; autorq; laboris  
 Phœbe pater: celsa qui nos tuearis ab arce  
 Et gregibus mites præstas sitientibus undas:  
 Hoc mihi perficias uotumq; uiamq; precanti,  
 Atq; iter æthereo susceptum numine firmes.  
 Vix ea finieram: paribus se sustulit alis  
 In sublime procul uolucris: cui garrula lingua  
 Caudaq; subsaliens: strepitus imitantia nostros

Guta

ECLOGA V.

Guttura, & exactum duplicato uellere corpus  
 Dùm tua fumosis circum uolat atria testis.  
 Hic tota pluma candens, niueoq; colore  
 Conspicua: excelsum dum scandit in aëra, rursus  
 Precipiti nidum lapsu petit, idq; rotato  
 Ter similis repetit, sinuatq; uolumina gyro,  
 Et tandem arborea subsidens fronde quieuit.  
 Ut uidi: mentem serijt mihi protinus illa  
 Dictorum senis, ac animum perculsit imago:  
 Hæc est sacra meis coniuncta laboribus ales  
 Et requies curis supremaq; semita nostris.  
 Salue Pica dijs gratissima: seu tibi cœlum  
 Scire futura dedit: seu te custode beatos  
 Seruarunt monitus. seu tu mihi pectore firmes  
 Commonstresq; uiam, curasq; animumq; serenes:  
 Labere propitio commissa per arua uolatu,  
 Et ueteres læto foueas subtegmine nidos.  
 Iamq; iter expleram, media cum ualle supinum  
 Aspexi saxum, uasto quod pondere latè  
 Prominet, & uiridi desertum in cespite regnat:  
 Saxum ingens, crudum, nodisq; immane rigensq;  
 Sed latere obuerso tersum: uelut æquora uentis  
 Haud tumidis cõstrata silent, dantq; humida mollè  
 Planitiem, ac leni compefcunt murmura ponto:

E

Incli-

M Y R M I X

Inclinata quidem quod summa cacumina uisum est  
 Submisisse solo, tacitamq; urgere ruinam.  
 Quantus in Aethneo consedit culmine Cyclops  
 Dilaceratq; genas & cecos lumina uultus,  
 Subnixus cubito, aut lentam complexus oliuam:  
 Sic sese in dextram latus inclinarat, & ipso  
 Penè quidem impulso lentescit corpore rupes.  
 Hoc iuxta ignotis excreuit fructibus arbos,  
 Ut ramos orno similis, sic cortice celsam  
 Procero tiliam, folijsq; tremantibus æquans:  
 Quam uarijs multi titulis, uarioq; comatam  
 Nomine multarunt, & ineptis uocibus urgent.  
 Hac equidem uolucris fatalis in arbore nidum  
 Fixerat: & latè circum dominata, repertam  
 Garrula compleuit, subiectaq; pascua uallem.  
 Ergo ubi me celeri uenientem lumine uidit  
 Instrepitat ramis, & agit clamoribus auras:  
 Seu fatis plaudat, seu tempora sera perosa  
 Præsago referat uenturas murmure sortes.  
 Intrepidus subij quo me meus ardor agebat,  
 Tentauiq; locum, saxumq; aspectibus hausi:  
 Et primo, uix ulla quidem uestigia Musis  
 Vidimus, ac nullos prodebat linea ductus.  
 Vsq; adeò nebulae, uenti pluuiaq; cadentes  
 Obliterare



ECLOGA V.

Obliterare, etiam tam duro è robore possunt.  
 Omnia muscus habet latè loca: sæua uetustas  
 » Quid non perdideris, silices cum tempora uellāt?  
 Ergo ubi deterfas subrasit dextera sordes,  
 Et ueteres medio patuerunt ordine sulci:  
 Tum uerò manifesta fides: quid numina diuum  
 Cœlitibusq; sacri, iunctissima pectora uates  
 In nostros cecinere dies, priscoq; relatu  
 Euenient sero non uana pericula mundo.  
 Gentibus Ismarijs, latioq; ego gratulor orbi,  
 Gratulor & terræ, si quæ longissima nostras  
 Ignorat clades, miserisq; penatibus absit.  
 Hinc mihi pastores, secli sunt multa prioris  
 Cognita, quæ nostros latuerunt pressa parentes.  
 Et uentura etiam nonnunquam fata solemus  
 Sarta Deo, recitare uiris: quos cura futuri  
 Detinet, & uario contristat pectora morsu.  
 Sic etenim securi, omnem superare ferendo  
 Fortunam assuescent: si, quæ tolerare necesse est,  
 Et prædicta dijs & cœlo condita norint.

Sed mihi nulla quidem tacitam sententia mentē  
 Crebrius exstimulat, nec fortius ulla resedit  
 Hijs animis quàm quæ agricolis uentura canebat  
 Omnia dura bonis, explendaq; tempora luctu.

E 2

Namq;

M Y R M I X

Namq; inter, saxo quæ multa inscripta futuris  
 Omina temporibus, decretâq; fata, notarant:  
 Hæc etiam conspecta, oculis quæ tristia siccis  
 Nemo leget, duro rigeant nisi pectora saxo.

Dira sacerdotes ubi sors & iniqua beatos,  
 Fecerit Agricolas:eadem cum rursus agrorum  
 Cultores, dominis statuat petulantibus omnem  
 Contemptus nasiq; leuis, risusq; petulci  
 Materiem:uiridi quod saxum in ualle secundus  
 Rumor erat liquido sacrasse cacumina cœlo,  
 Incubuisse solo terramq; petisse uidebis,  
 Hostibus euersum diræq; Tyrannidis armis.

Vidimus ô pueri, digestâq; carmina nostris  
 Hausimus hijs oculis signatâq; carmina saxo.  
 Et uidisse sciunt pastorum turba, frequensq;  
 Hortor:ut & spectent seri præfagia mundi  
 Prudentes,ueteriq; ferant hæc sæcula dicto.  
 Deniq; peruigiles impulsa cacumina seruent  
 Casuri lapidis:Neq; enim protracta ruinam  
 Distulerint : ast hæc etiam sunt tempora nostros  
 Quæ permensa dies fusam tellure uidebunt:  
 Pronum etenim caput inclinat,lapsumq; minatur.

Hæc sunt ô Lycida,quæ tum pastoribus antro  
 Ipse quidem nostro cecinit præfagia Myrmix:

Mouit

ECLOGA V.

Mouit & hoc etiam, neq; enim celauero, pectus:  
 Ut quascunq; sciam studioq; animoq; ferendas  
 Esse uices facili superandaq; dura ferendo.  
 Nam placeant cum seua dijs, quid sparsa ueneno  
 Murmura profuerint? num cœlica iussa Tonantis  
 Infringet cinis & uinclo constringat inani?

Interea sed iter nostrum consecimus: hinc tu  
 Ingressus uenerere Deos, supplexq; Tonantem  
 Mollibus armentis quæ prata salubria poscas:  
 Liber adhuc nostros inter foelixq; colonos.  
 Nos uerò domini pulsabimus alta potentis  
 Atria, & excelsas nequicquam uellimus aures.  
 Sic prædicta quidem miseros oracula damnant  
 Agricolas: fatóq; domos populantur & arua.  
 Haud aliud Dominis siquidem nos rustica turba  
 Nunc sumus, euerso postquam gemit area saxo:  
 Quam firmata dijs, stolidi ludibria uulgi.  
 Utq; ferire solent timidæ concussa uolucres  
 Retia, & incautis gelidam subuoluere mortem:  
 Sic nos oppressi fatis, dura omnia mæsti  
 Cogimur, inductis perferre laboribus æuo.  
**Ly.** Pyrame tranquillo uitæ decreta feramus  
 Pectore supplicia, & supero cedamus olympo.  
 Forsitan & tempus ueniet, quo seua Tyrannis



DAPHNIS

*Ipsa suas populetur opes, animiq; cruenti  
Flagitiosa luet concusso iurgia mundo.*

ECLOGA

SEXTA,

DAPHNIS,

*VIRTUTVM AC PIE-*

*TATIS IMPERIIQVE FOELICIS  
CHRISTIANI III. sanctis-*

*simi Danorum Regis, testimo-  
nium continens.*

*MOPSVS, CORYDON.*

**P***astorum luctus, Corydonis & anxia Mopsi  
Carmina, plorantes quos est complexa beato  
Delia prospectu, gemitusq; ferebat ad aures  
Alta meas, sero cum lumine Cynthius orbem  
Falleret, & magno radios subduceret igni.  
Pastorum gemitus, acriq; expressa dolore  
Fusaq; subtristi referamus carmina uultu.*

*Phoebe*

ECLOGA VI.

Phœbe pater, gelidi quōdā qui in mōtibus Hæmī  
 Pastor agens pecudes, telluris obire malignos  
 Consuesti tumulos, interq; salicta rubosq;  
 Florentes querulo meditari pectore Versus,  
 Adsis, & mœsti tenues rege Vatis habenas:  
 Plectraq; lugubri iam pridem territa fato,  
 In numeros rursus solitasq; reduxeris auras,  
 Consuetumq; animis trepidantibus adde uigorem.  
 Pressa rigent mihi Gorgoneo stupefacta cruore  
 Pectora, & ostensæ trepidant fera tela Medusæ.  
 Has equidem nebulas iniecta q; frigora menti  
 Soluis, & Aonio discussa calore serenas.  
 Haud omnes, quæ læta iuuant: fortasse mereri  
 Hæc etiam possunt aliquam data tristia laudem.  
 Euersas referunt fraterno uulnere Thebas,  
 Et Troiam cecidisse manu, gladioq; cruento:  
 Haud tamen è medio populi sermone remota est  
 Thebais, & sacram Vates Aeneida uoluunt.  
 Quare nulla magis, nostris certata legantur  
 Scripta deis: sacrum quàm quæ sibi pagina nomen  
 Daphnidis inscripsit, dubio quem iure solutum  
 Iuppiter astrifero, rectis pater, intulit orbi.

Ergo ubi crudeli pastores funere Daphnim  
 Extinctum sensere, equidem licet omnia nocte

DAPHNIS

Mersa forent, superoq; excesserat altus olympo  
 Delphicus, & uacuo regnaret Cynthia mundo:  
 Conuenere tamen, medioq; alterna uolutant  
 Carmina singultu, subterq; uirentia musco  
 Robora confidunt: foribus quæ iuncta sinistris  
 Luce solent densas protendere frondibus umbras.  
 Stabat & aduerso tilia contermina laurus  
 Cesspite: quæ ramis complexa uirentibus auras  
 Incubuit tecto: iuxtaq; recincta cupressus  
 Ferales misero circumdedit omine postes.  
 Iamq; aliquam coeli facies, haud nescia, partē  
 Flexerat, et rutilos Eoo aduexerat ignes,  
 Claraq; per segnes radiabant sidera terras:  
 Cum simul exortus, gladioq; accinctus Orion  
 Et ferus aspectu: tum humero truculentus utroq;  
 Constitit Oceanum contra, pedibusq; iacentem  
 Proculcans leporem, uibrato protinus ense  
 Fulminat, & lato uestigia spargit in orbe.  
 Hic Corydon: neq; enim superi uastissima coeli  
 Regna ignorabat, constratauē nubibus astra,  
 Suspiciens: Quid Mopse solo miremur & orbe  
 Bella geri nostro, subitisq; tumultibus acta  
 Plurima conficiet scelerati culmina mundi?  
 Cum coelo pugnae spectentur, & arma sereno  
 Vibratas

ECLOGA VI.

Vibratas agitare faces: gladijsq; fatigent  
 Æthera, quæ uario consurgunt corpora motu.  
 Aut hic flagitij quantum nymbosus Orion  
 Designat malus, oppresso dum uiribus altis  
 Turpiter insultat lepori: pedibusq; minores  
 Calcat, & audaci dilatat crimina facto?  
 At si pædophagum (et Saturnum monstrat olympi  
 Consedisse iugis: celso qua uertice Taurus  
 Pleiadas gestat, Phryxæaq; uellera lambit)  
 Infectosq; odio uultus, crimesq; timendos  
 Stringeret, & nocuos inhiberet amicior ignes:  
 Tum mihi uel fortis uenator & aureus esset,  
 Vel dignus cœlo princeps: qui lata teneret  
 Iunctaq; regna dijs: huic quod sua cura proteruos  
 Euertisse foret, magnosq; domare Tyrannos.  
 Nunc minimas terrere feras, haud ampla putetur  
 Gloria, nec claris ea laudibus acta redundant.  
 Sunt ibi Serpentes: sunt Phorsidos ora Medusæ,  
 Sunt clypei, Alcidaq; manus, septemq; triones,  
 Vicinaq; polo iunctisq; draconibus Ursa:  
 Has peteret. Sed nec facile est obsistere sæuis  
 Hostibus, & prompta superantur clade minores.

Mo. Desine coelestes rigidis incessere dictis  
 Aethereumq; sui genus insimulare furoris.

## DAPHNIS

Omnia sidereo pacatis legibus orbi  
 Astra meant: uetere dij suboririer istis  
 Iurgia dira locis, pugnamue laceffere facto.  
 Hæc tibi nostra feret tellus exempla: cruento  
 Mortales inter diduci uulnere sortem,  
 Fataq; non grato miseris certamine uolui.  
 » Inualidis statuunt sceleratas fortia leges,  
 » Chaoniasq; premunt Aquilæ decreta columbas.  
 At securus agit nulla formidine Pardus,  
 Arbitrioq; citi confirmant iura Leones.  
 Nec tamen inficias ueniam, si lumina, falcem  
 Pædophagi diram, siue hic uiolentus Orion,  
 Siue alius cœlo quicumq; potentior omnes  
 Terret, & in nostrum iaculatur fulmina mundū:  
 Telâq; funestis intincta doloribus alto  
 Vertisset comprehensa polo, manicisq; teneret:  
 Forsitan ah Daphni, ah non intercepta fuissent  
 Hæc tibi secla bono: nec acerba morte iaceres  
 Victus, & ingenti multares clade colonos.  
 Confecto sed enim nunc cassum lumine plorant  
 Aones: & querulo testantur sidera luctu.  
 Co. Orpheus ut cythara, & fidibus traxisse sonoris  
Dicitur Hæmonias nodosaq; robora quercus,  
Et rigidas mouisse feras cantuq; lyrâq;:

Sic



ECLOGA VI.

Sic meus ingrato sublatus funere Daphnis  
 Cuncta trahit: seu quis metuendo Gorgona uultu  
 Aequet, & effreni stygias tonet ore sorores:  
 Seu medias inter sylvas, nemorumq; recessus  
 Degat, & ambito lassat sua corpora luco.  
 Deniq; nec genus humanum, nec bruta feraq;  
 Aut raptō Tygris longē saeuissima partu,  
 Lugubres tenuere modos: sed mersa dolore  
 Protinus ingenti, stupefactaq; pectora uersant.  
 Daphnis enim nostras, supera dū uescitur aura  
 Curauit pecudes, & rura benignus amauit:  
 Nunc ergo extinctum non tantum nobile quercus  
 Robur, & elata frondens propagine Vitis  
 Populumuē nemus, folijsuē fluentibus orni,  
 Castaneæ molles, signatāq; funere Laurus  
 Deflet, & ingentes attollit in æthera luctus:  
 Verum etiam ferulae lenes, humilesq; myricæ,  
 Phyllis, & exacta surgens Paliurus acantho,  
 Ac rubus, arboreamq; inter densissima prolem  
 Rhamnus, & Ausonijs agitata paludibus Agnos,  
 Luctiferos produnt sonitus, aurasq; dolore  
 Multiplici feriunt, aduersaq; tempora damnant.  
 Deniq; quāmetuo ne solis stirpibus istud  
 Venerit exitium: fortassē ea uulnera fruges

Vnā

DAPHNIS

Vnà etiam tangent, segetumq; in fata mimentur.  
**Mo.** Incensæ quantus prorupit ad æthera Troiæ  
 Clamor: ut euerso trepidarunt culmina regno,  
 Inq; domos domus acta cadit, tectoq; relapso  
 Instabant similem properantia tecta ruinam:  
 Tantus & extincto superum percellit Olympum  
 Daphnide ploratus, lachrymasq; in sidera iactat.  
 » Daphnis amor populi, et nostri decus omne laboris  
 Parcarum sæua traiectus arundine, mæsto  
 Funere supremos orbi conclusit honores.  
 Eheu crudeles nulloq; piamine fractas  
 Immitesq; deas, calatho quæ fila coloq;  
 Tenditis, & cæco producta exscinditis ense:  
 Ritene Parcarum nomen gessisse malignas  
 Crediderim: nulli cum parcere dextera norit  
 Vestra, nec audaces quisquam deluserit ignes?  
 Omnia propulso rapitis ceu turbine: molli  
 Indulgere ioco uolupte est, dum tincta ueneno  
 Coniicitis tristi miseris uenabula iactu:  
 Idq; occultò etiam, ne scilicet ante, futuras  
 Prospiciat clades hominum genus, actaq; cauto  
 Deludat gyro coniectaq; tela retardet.  
 Vtq; luant meritas alij, quas crimine diras  
 Assolet ingenti uulgus sibi condere pœnas

Contem=

ECLOGA VI.

Contemptuq; Deum:coelo dum prona repugnat  
 Et sua sidereum contra ferat arma Tonantem:  
 Quid meus hic tandē poterat cōmittere Daphnis:  
 Compensum insidijs,ut acerbo uulnere Clotho  
 Conficeret, medioq; secaret stamina cursu,  
 Et sua funesto contenderet ore uenena?  
 Cum patria pietate Deos,coelumq; Iouemq;  
 Iusticiamq; Deam coleret, Virtutis alumnus,  
 Et cinctam gemino retineret limine Pacem.  
 Heu nimis imperio duras,herebiq; parentis  
 Inuisam sobolem,ac noctis scelerata proteruæ  
 Pignora:quis tanto Cocyti è faucibus actas  
 Armauit iaculo cæcaq; Tyrannide fudit?  
 Si nequit expleri supero sine sanguine,Ditis  
 Regia depressi:Tristes rapuisse licebit  
 Humani generis laruas,Asinosq; luposq;  
 Immundosq; sues,metuendos ungue Leones,  
 Indomitosq; boues, & agentes bella Caballos,  
 Monstraq; plura solo circum gradientia nostro:  
 Sublimesq; aquilas etiam,plumasq; superbi  
 Vulturis,Accipitresq; feros,miluumq; rapacem,  
 Et curuos auido flagrantes pectore Gryphas,  
 Gryphas hyperboreo studium quibus acrius orbe  
 Insidijs aurum & congesta laboribus æra

Eruere

DAPHNIS.

Eruere, & uitam raptu sacrare metallis.  
 Aut diis inuisos & humo populisq; Tyrannos  
 Funere submotos tristi transmitteret undis,  
 Qua lacera multo iam pondere corpora cymba  
 Prouehit, & longis importat nauita ripis:  
 Excipit aduectos ultróq; in regna remittit  
 Cerberus, & nullis tenebras latratibus urget.  
 Deniq; tuta foret probitas, Stygiamq; paludem  
 Sperneret, & nullo pietas superata furore  
 Vel medium infernis ac morti porrigat unguem.  
 Tum stragem sæui faceret uiolentia Ditis  
 Spectandosq; daret cumulos, ubi mixta iacerent  
 Corpora fusa solo, facibusq; extincta sinistris  
 Plurima turba feras inter uolucresq; luposq;  
 Atq; canes, interq; boues interq; Leones.  
 Interea tutis habitaret in ædibus alta  
 Virtus, & nullo pietas premeretur ab hoste.  
 Nunc contrà cum res fieri manifesta, diesq;  
 Infœlix probet, & nullo discrimine sterni  
 Iniustos iustosq; uiros, tetroscq; bonosq;:  
 Accusant meritò parcarum iura coloni,  
 Tristiâq; in superos effundunt pectora Diuos.  
 Quamq; nec solis luctus pastoribus iste  
 Corda ferit, Cygnos etiam mitésq; palumbos  
Hausit

ECLOGA VI.

Hausit, & oppletis auaritia fletibus urget.  
 Scis Corydon, strepitu quanto Philomela solebat  
 Hos inter ramos, atq; hæc uiridaria circum,  
 Fallere luctantes atra caligine noctes:  
 Scis merulam sturniq; genus lætasq; cicadas  
 Exiguasq; alias pulcherrima dona, uolucres,  
 Alternare sonos: atq; arbuta nostra recenti  
 Intertexta rubo conclusaq; sepe, uolatu  
 Multiplici transire, uagoq; salire recursu,  
 Hæc tamen aut fugisse loca, aut compressa dolore  
 Sub pennis luctum testantibus abdere rostra.  
 Hybernas sedenim ne tu mihi protinus auras  
 Obiecisse uelis, atq; anni tempus, & ipsas  
 Naturæ leges infusaq; semina rebus:  
 Est etiam pastor, non explorata latentis  
 Semita naturæ quædam, quam nulla sagaci  
 Ingenio uis nosse queat: licet omnibus instet  
 Articulis hæc cura, animumquæ extendat & artes.  
 Quis Marium & duros fato conflagere Cimbros  
 Aut neget, & temerè tantas concurrere gentes:  
 Aut satis alitibus uenturæ conscia cædis  
 Pectora uulturibus præsagaq; lumina, dictis  
 Explicet? Ausonidū namq; agmina cauta uolucres  
 Præcessisse ferūt, auidoq; cadauera morsu

Signatis

## DAPHNIS

Signatis petiſſe locis, prædamq; morari.  
 Deniq; quo patrios perculſa Ciconia nidos  
 Extulit ingenio: cum Aquileia pulcra Tyrannis  
 Diripienda foret: caderentq; ſub hoſtibus arces  
 Romulæ, & diros Latium ſentiſceret ignes?  
 Sunt igitur conſerta Deo ſecreta feracis  
 Quædam nature, nullis quæ industria ſignis  
 Indagare potis: ſupero ſed cognita mundo  
 Expediunt tacitis proprios uirtutibus actus.  
 Attamen haud alio rerum magis ordine poſſunt  
 Hæc deprenſa dari, neq; condita clarius extant:  
 Quàm uolucrum ſtudijs, & amena lege canendi.  
 Hinc etiam paſtor fortasſè ſilentia noſtræ  
 Et luëtus teſtantur aues, ſubterq; recuruos  
 Arboris effuſæ ramos, ſæpeſq; quieſcunt,  
 Ac unâ noſtri caſum indignantur amici.  
 Sed quid ego hæc paruis accepta uolucris addam  
 Vulnera, & inuiſum pergam renouare dolorem:  
 An gemere aërea deinceps ceſſabit ab ulmo  
 Turtur, & extincto longum fleuiſſe marito?  
 Haud facile eſt dubios medio concludere luëtum  
 Euentus: fortasſè aliquis læto omnia fine  
 Vertet acerba Deus, ueteriq; in ſede locabit.  
 At Iouis æternum genus & ſuper omnia dulces  
Muſe

ECLOGA VI.

Muse, quæ sacrum pandunt Heliconæ Camœnæ  
 Fons ubi Pierio circum fluit arua liquore,  
 Bellerophontei uirtus pedis Hippocrene,  
 Fusius & gemitu luctus testantur, & æquo  
 Sidera ploratu, terrasq; salumq; fatigant:  
 Et submota suis etiam loca questibus implent.  
 Vulnere nã languent tanto, steriliq; gementem  
 Suspendunt Cytharam pulsataq; Barbita, sorbo.  
 Aonidas siquidem Daphnis coluisse sorores  
 Fertur, & hoc nulli studio uixisse secundus.  
 Qui quæ uel Latij populis, uel more uetusto  
 Argolicis descripta forent præloq; dicata  
 Legerat, aut saltem digesta locarat in arce  
 Illustri: seros ubi fas est sceptrâ Nepotes  
 Ferre manu, & sacris solatia uatibus esse.

Sed neq; sola gemit iam cassum luce Thalia:  
 Aequora fleuerunt etiam mihi Balthica Daphnina  
 Et retrò ueteres retulerunt flumina cursus,  
 Gudius, & fundo subflauis Lymicus undis:  
 Quin Lyrin sensisse ferunt Rhodanumq; dolores  
 Danubiosque deos, mixtumq; coloribus Albim  
 Ac Rhenū, celebremq; Tagum Viadrumq; ruentē.  
 Hos etenim fluuios & littora iuncta colebat  
 Integer, ac sancto retinebat fœdere gentes.

F

HUNG

## DAPHNIS

Hunc ergo extinctum merito ploremus, et altos  
Testemur lacrymis facientia uulnera luctus.

Mo. Tale tuum carmen nobis ô Mopses salutis  
Quale inopi uotis ac spe comitante potiri.  
Impulsus equidem fortunæ ac iura nouercæ  
Sensimus ô pastor: Sed enim quia tristia nemo  
Vincula fatorum completæ ué fila retardat,  
Fortiter assuescas subitos contemnere casus  
Et tua dura pati: quorum cum maxima Diuis  
Cura, queunt nostra nunq̄ superari arte.  
Et quia iam licûi fatalis tela peregit  
Daphnis, anhelanti resolutus corpora somno,  
Cedamus superis: et turbæ iuncta uoluntas  
Nostra sit æthereæ: ne quid petulantibus auræ  
Haud segnes rapiant, mœsto quod gutture sparsum  
Oppugnet cœlos, ac bella mimetur olympo.  
Quin meritis potius cumulemus funera uotis,  
Sublatumq̄; solo Daphnim referamus in astra  
Sublimesq̄; domos, nitidiq̄; palatia cœli:  
Celsus ubi magno sacratus corda Tonanti,  
Sub pedibus terras transmissaq̄; regna Nepoti  
Cernet, et exemptas è carcere liberet urbes.

Ergo mihi quacunq̄; uagas perlabitur undas  
Oceanî Nereus, luctantia flamina uentis

Sistas



ECLOGA VI.

Sistat & equato constrauerit æquora ponto:  
 Monstraq; terruerit latos urgentia fluctus,  
 Delphinosq; uagos, turpesq; sub inguine Phocas  
 Et Fibros dulces, & amantes flumina Lustras  
 Cetorumq; genus, refluoq; natantia Nilo  
 Corpora, et Hippotamũ, spirisq; tremētibus anguēs  
 Omnibus è celso taciturna silentia curru  
 Imperet, & lituo circum domet æquora Triton:  
 Consciscatq; Deos effusaq; numina ripis,  
 Fluctigenũq; manus, & amantes littora Nymphas:  
 Protinus ut socio Neptuni ad limina Regis  
 Agmine concurrant, tacitisq; ita postibus adstent  
 Arrecti, facilesq; dii, pulcerrima turba.

Inde aliquis simili terram mihi fronte serenet  
 Iuppiter, & blando permulceat omnia uultu:  
 Excussasque polo nebulas fuget: eximat umbris  
 Corpora, & undantes dispellat ab æthere nimbos:  
 Irradietq; orbi nitidis fax aurea stellis,  
 Astraq; nec fusca cœlum caligine mergat.  
 Non mihi saltantes tenui quod luce capellas  
 Obijciat numen, cœlouè tonitrua spargat:  
 Nec tedis uacuum rutilantibus aëra turbet,  
 Fulminibusuè trahat metuendos frugibus ignes,  
 Et prodatur subito dirum splendore Cometen:

DAPHNIS

Sed sua pacato gradientur sidera motu,  
 Atq; serenatis collustrent uultibus orbem.  
 Postremò iunctis stupefactà cubilibus, alto  
 Sylvarum tractu, patrijs uelut abdita tectis  
 Procumbant, solitosq; premant animalia gressus.  
 Haud lupus insidijs, nec ui Leo pugnet in Vros.  
 Incautas ué feras lacerent, leporesq; capellasque,  
 Aut timidos Damas, aut molles carnibus agnos.  
 Omnia proposito compescant praelia iussu  
 Sylvanusq; senex, atq; his iam cognitus oris  
 Pan Deus, & fauni celeres, atq; hispidathyrso  
 Pectora succinctus molliq; ornatus acantho  
 Fronte tenus, medijs Satyrus qui in saltibus errat  
 Varus, & haud fesso metitur pascua cursu  
 Hecq; eadem genus alituum pietasq; uolucres  
 Cura premat, teneatq; alto reuerentiâ nido.  
 Deniq; tranquillo consistant omnia uultu  
 Corpora: siue globo circum uoluantur agræstis  
 Seu liquidi tranare solent uastissima ponti  
 Flumina, seu uentis impulsa fugacibus errant.  
 Omnia concepto substricta pauore filescant  
 Et uelut impositis submittant legibus iras.  
 At dulces Musæ cythara fidibusq; canoris  
 Altius ingement, interq; silentia sola

Voce

ECLOGA VI.

Voce sacra nostrum referant ad sidera Carmen.  
 Quamuis magnus enim contundat pectora luctus,  
 Et diuas turbent hæc tristia nostra Camœnas:  
 Indulgere tamen fas est Heliconæ colenti,  
 Paulatimq; novos studio succrescere uersus.  
 Pastores etenim Daphnimq; canamus, & illum  
 Si qua uia est meritis supero statuamus olympos.  
 Et nunc Mopse prior, siquidem libet, incipe: nec te  
 Aut gemitus magni, aut sperata pericula tardent.  
**Mo.** Cana fides, Vestæq; foci, Pietasq; Deorum,  
 Præcipua ò Corydō, decorarūt numina Daphnim.  
 Ergo ubi nunc alti resident super ignea cœli  
 Mœnia, sublimes diuis, non irrita dictis  
 Turba, sed æternæ radio pulcerrima lucis:  
 Fas equidem sacris posuisse cubilia tectis,  
 Longa quibus iusti pastores secula uoluant.  
 Curua ministerio facili Thaumantia proles  
 Si poterat regnum & cœli loca uasta mereri:  
 Si diuis, blandus ueheret quòd Ariona Delphin  
 Successit: niteatq; polo, quòd littore Phryxum  
 Acceptum tuto socia pereunte locarit  
 Cornibus excelsis Aries, qua grandia Taurus  
 Lumina, uicinis Hyadum regionibus implet:  
 An Daphnim nullis dignentur honoribus, æqua?

## DAPHNIS

Qui meritis diui referunt sua premia lance?  
 Imo age, iam superos inter consedit, & orbem  
 Hunc spectat nostrum subiectaque regna tuetur.  
 Co. Quod pretium Gemmis, & amomo florea uirtus  
 Sidera quod cælo, restuiq; quod æquoris undæ  
 Piscis, & insigni uiridissima gramina campo:  
 Gentibus hoc uixit nostris, qui Daphnis olimpo  
 Nunc colitur, magnosque inter tenet æthera Diuos.  
 Inuida fatorum series, parcisque molesta  
 Crudelisq; manus uallataq; dextera morte,  
 Delicias hominum lugubri, funere Daphnim  
 Eripuit populis terrisque, & cladibus auxit  
 Syluestres cytisos, habitatq; rura colonis.  
 Ast quid seua odijs tandem promouit & ira  
 Atropos, aut diræ Lachesis coniuncta sorori?  
 An simul humanis exemptum legibus, orco  
 Præcipitare potis, sacroq; immittere diras  
 Ultrices animo uitamque resolvere Diti?  
 Haud fas esse sinit magui Deus ætheris: et si  
 Elysios miretur agros, manesque beatos  
 Græcia, et huc celebres canat irrupisse Monarchas:  
 Sed cælos habitare dedit, claroque morari  
 Sidere: qua spacio uenturis Lactea Diuis  
 Semita concessit, niueas ubi candidus alas

Pandit

ECLOGA VI.

Pādīt olor, Cepheoq; caput premit aētus ab austro  
 Circulus, in geminas qui diuidit æthera partes  
 Et mediā summo dispescit Apolline lucem,  
 Cū uidet Eois mox tollere fluctibus ora  
 Sidereos Cancros, ubi finitoris in undas  
 Emergunt, contraq; freto cubuisse Booten:  
 Numinis iste noui locus est, ea regia Daphnim  
 Suscipit: hoc nostras solio prospētat in urbes.  
 Salue uera Deūm soboles, uitæq; corona  
 Cœlicolum: tua qua tibi cunquē sedilia uirtus  
 Ponet, & æterno comitem dabit esse Tonanti.  
 Labere nonnunq; pennis, atq; æthera tractu  
 Scinde nouo, & patrium tua dextera sospitet orbē:  
 Mæstaq; concipias pastorum uota precesque,  
 Et tua non tardo poscantur numina fructu.  
 Mortali poteras deuinctus carcere, curas  
 Tollere mortales, & uerba precantia molli  
 Excipere ingenio durosq; leuare labores:  
 Nunc igitur fatis liber iunctusq; Tonanti,  
 Nec potis humanos iterum sentire dolores,  
 Quid facies? equidem toto prius æquore mundum  
 Obruat, & ueteri mergat Deus omnia uultu,  
 Quā tete nobis non credam uatibus esse  
 Seu numen: propria seu te uirtute beatum



## DAPHNIS

Venturos Musis Phœboq; sacrare Nepotes.  
 Deniq; non alio te uirtus sine locauit  
 Vicinum Cygno, stellisq; micantibus auxit.  
 Quam prisca ut ferres dignam pietate Coronam  
 Illustriq; loco stares: qui plectra Mineruæ  
 Complexus, Phœbo Cygnisq; canentibus aures  
 Præbueris faciles, & opus mercede probaris.

Plaudite Diuæ igitur, cœlo quibus alta potestas  
 Condere sidereo carpentem premia Daphnim,  
 Vester enim miles, dum uiueret ille, decusq;  
 Dulce fuit: uestris letalia uulnera castris  
 Hæc habet, & uestro luctas mucrone peregit.  
 Hoc igitur rursus uos Iuppiter æquus honore  
 Donat, ut extinctum referatis in æthera Daphnim:  
 Sed retulisse reor, uestrisq; amplexibus altum  
 Cernere foelices immensa per æthera diuos.

Ergo prior miseri penè unica gloria mundi,  
 Præsidiumq; uiris & diis accepta secundis  
**IUSTITIA**, adsistas spectati plurima Daphnidi,  
 Atq; immortalis signatam luce Coronam  
 Diuino capiti perq; ignea tempora condas:  
 Bellorum memor ac cædis, qua dura furenti  
 Spicula præripuit solersq; ac strenuus hosti,  
 Qui tua conatus uastata Tyrannide regna

Præ



ECLOGA VI.

Præcipitiq; impulsa iugo conuellere, longas  
 Agminis Ausonij turmas spirarat ab orco.  
 Has equidem Daphnis fretus pietate Deoq;  
 Expulit à laribus patrijs: & ouilia tuto  
 Confirmata loco, tranquilla in pace locauit.  
 Halcyones quo more, salum dum nulla fatigat  
 Tempestas, hyemis medio suspendere nidos  
 Et scopulos inter, partum celerare feruntur.  
 Daphnidis hæc igitur studio sunt ocia nobis  
 Halcyonumq; dies: uiuitq; hæc littora circum  
 Iusticia, ac largos transmittit in æthera fructus.  
 Cineta Deo, superumq; choris, & iuncta Tonanti.  
 Proxima constanti iam fronte Modestia, lato  
 Tecta pedes clauo, digitosq; uerenda quietos,  
 Officijs conferto manus: accingere sacro  
 Sacra ministerio, ac epulis data fercla secundis  
 Ambrosiosq; cibos, semperq; uirentia cœli  
 Munera, diuino ponas redolentia disco.  
 Vt superabat enim frugali pectore luxum  
 Scis Dea, scis sanctè mensisq; & uiribus usum.  
 Tum PAX alma loco præptæ succedat alumna  
 Nectarâq; infundat cyathis, & eburnea libet  
 Pocula, & æterno carchesia flore coronet.  
 Nam cum pace quidem nil dulcius esse uideret,

## DAPHNIS

Hanc animo coluit prompto, uinclisque tenebat  
Fortibus astrictam, ualidisque premebat habenis  
Sobrius, & nulli temerè grauis: æquus in omnes  
Arbiter euentus, semperque futura priori  
Sedulitate, uelut digito monstrante secabat.

Postremò famulari etiam sacra pignora Regis  
Aetherei decet, ac facili modulamine Musas,  
Exhilarare Deos mensisque astare secundis:  
Tum Cytharam sumpsisse manu, cantusque mouere  
Sidereos inter ciues, diuos que beatos.

Principio ut nullis perfectum nexibus orbem  
Condiderit Pater Altitonans, coelosque locarit  
Astriferosque globos, liquidique uolumina regni  
Ambitasque salo terras, uolucresque ferasque  
Ac hominum genus, & uasto salientia ponto  
Corpora: tum leuibus circumuolitantia uentis,  
Surgentesq; solo diuerso cortice stirpes,  
Seminaque arboribus non deficientia nostris:  
Mox Solis Lunaque uias, tardosque planetas  
Atque laboriferos expansa per æthera currus:  
Hinc populos, curasque Deum, iurisque Triumphos  
Et magnas patrijs florentes legibus urbes:  
Postremo Ingenij cultus artesque beatas  
Connubijque sacri pretium, semperque manentis  
Circuina



ECLOGA VI.

Circuitus animi, & regni cœlestis honores:  
 Musa canet, referat sonitus conuexa Tonantis  
 Regia, & impresso geminabunt corpora motu:  
 Audiet, & leto sese feret omine Daphnis,  
 Dijq; Deaq; omnes, nostros quicunq; labores  
 Fortunare solent, & condita rura tueri:  
 Vota ministerio celeratâq; pectora fundant  
 Assistantquē Ioui: magno qui magnus honore  
 Et cumulat nostrū, et releuat formidine Daphnim.

Interea dum longa dies uentura Nepoti,  
 Differat æthereo productum corpus olympo  
 Sistere, & é gelida motum tellure beatis  
 Iungere spiritibus: diuos ubi clara penates  
 Regia sidereo retinet suspensa pyropo,  
 Atq; dicata fouet cœlesti membra Tonanti,  
 Daphnidis extincti florescat nomen: & inter  
 Marcellos, Deciosquē graues, geminosquē bonosq;  
 Scipiadas, claro meritis trahet ordine laudes:  
 Primus Aristidi, & diuo comes ibit Arato,  
 Phocioni, Paulis, & fortibus arma Metellis  
 Publicolisquē: uiris quorum celeberrima longos  
 Ipsa sibi statuisse dies clarosquē triumphos  
 Ut poterat Virtus: ita nunc diffusa minores  
 Suscitât, & sobolem stimulis ferientibus urget.

Deniq;

DAPHNIS

Deniq; nec seros moueat magis ulla Nepotes  
 Gloria: sidereo quam splendens nomen in orbe  
 Daphnidis, & priscos notum pietate per annos.  
 Utq; solent faciem speculis ac ora tueri,  
 Composito quicumq; comas ac tempora mulcent.  
 Sic gens, indigetes inter uentura morantem  
 Suspiciat diuos adamataq; numina, Daphnim.  
 Quoq; hic more bonos coluit, quo iure Camoenas,  
 Quo rectum studio supremis proximis annis  
 Librauit prudens, rerumq; aspexit in usus:  
 Deniq; qua pietate Deos complexus, olympum  
 Intulit ingenio, ac spe sidera celsa tenebat,  
 Quoq; animo misera confectos sorte beaur,  
 Omnia contendant imitari facta Nepotes  
 Et studio quæ recta, petant: quæ pulcra, sequantur.  
 Rura colant: coluit prior ardua prædia Daphnis  
 Longaq; defensis pastoribus ocia præstent.

Mo. Fœlices tali Corydon te uate colonos:  
 Omnia diuino cui fas comprehendere uersu,  
 Et canere extremo superanda pericula mundo.  
 Tu cœlos Solisq; uias, Lunaq; labores  
 Pleiadasq; Hyadasq; leues, uariosq; planetas  
 Succinctamq; refers geminam serpentibus Arcton:  
 Tu terre tractus, & agentes nubila uentos,  
 Oceaniq;

ECLOGA VI.

Oceaniq; canis spumantes littore fluctus.  
 Deniq; qui Reges etiam clarosq; Monarchas  
 Et solitus gladio seuos memorare Tyrannos,  
 Pastorum lusus certataq; dicta benigno  
 Peruolitas plectro, confecta q; iurgia narras.  
 Usq; adeo tibi foecundis compacta redundat  
 Fistula carminibus, uariosq; subire labores  
 Docta, nec ingenti lassatur pondere, nec se  
 Subducit minimis, & agros fastidit amenos.  
 Aut hic quali etiam subuectus in aethera cantu  
 Daphnis olympiacos, coelestia tecta, penates  
 Scandit, & aeterno rutilans caput intulit orbi:  
 Conseditq; domos inter, qua plurimus altis  
 Est meritis honor, ac sanctae reuerentia uitae?  
 Quid? quod & exceptum, fama comitante, canendo  
 Supremos clausisse dies, & proxima fatis  
 Tempora plaudenti similem coelumq; petenti,  
 Commisisse Deo: nec uersus inter & atrae  
 Disruptos numeros resolutaq; uincula morti,  
 Plus uenisse morae, quam si noua Clepsydra septem  
 Stillarit tenui pertusa foramine guttas.  
 Eia age, foelicem tali sub funere vitam,  
 Optandamq; bonis nulla formidine Mortem.  
 Hic nihil horribili percellit imagine: nullo

Pingit

## DAPHNIS

Pingit acerba metu: seculi uelut acta prioris  
 Damnaret, uitæ properantis ad ultima gestu.  
 Ast qui, qua uitam Daphnis pietate peregit,  
 Tempora propositis diuorum legibus auget,  
 Haud aliter, q̄ Daphnis humū moriturus & orbē  
 Incertosque dies & agentes fraude, relinquit.

**Co.** Rectè equidem ô pastor, socij meminisse uideris  
 Illius, hæc quondam iunctus qui rura colebat  
 Fœlix, & molli nobiscum uixit in aruo:  
 Id Myrmix siquidem memorare solebat, & usu  
 Compertum ueteri dixit: quibus acta fuisset  
 Moribus, hijs etiam concludier ultima uitæ  
 Tempora, nec finem diuerso stamine duci.  
 Et mihi Romuleos inter recitare Tyrannos  
 Nonnunquam Marium solitus: qui qualiter annos  
 Egerat, & uario turbarat crimine mentem:  
 Sic quoque liuenti sua secula mancipat orco,  
 Et miserum frendens, uiuendi iura resoluit.  
 At placida noster sopitus fata quiete  
 Daphnis obit, nulliquè grauis, nulliquè timendus:  
 Cœlica sed Diuum uelut ad consortia cœssit,  
 Et dedit exactæ documenta salubria uitæ.

**Mo.** Ergo nec ille tuo fraudatus acumine uiuit  
 Sidereos inter diuos, regnumque sub imis

Coma

ECLOGA VI.

Conspiciens pedibus, terrasque tuetur & alti  
Iura freti, media nebulas in luce serenat  
Aequoreosque graui compescit numine fluctus.  
Nec maius sanè quicquam superiue diesue  
Ingenijs poterant Vatum submittere, nec quo  
Promptius illustri decurrat Pegasus aruo.

Dū Lybicas maculis sparsus terat anguis arenas  
Taigetamque canes, & equos Epidaurus amarit,  
Dumque niues ferat altus Atlas: dum sidera cœli  
Voluat, & ardenti consistat Phœbus in orbe;  
Semper honos, nomenque tuum, florensque manebit  
Gloria, & argutos inter dispersa Poetas,  
Aeternos merita ducat face Daphni Triumphos.

Sed sublapsa ruunt properatam sidera noctem,  
Et summa rutilos attollit imagine uultus  
Sirius, ac medio radios dispescit olympo,  
Incumbitque solo decliui corpore Cetus,  
Atque Arias pronas iam tinxit in aequore partes,  
Cedamus nocti Corydon, tectumque petamus.

Co. Longa dies miseris, & egentibus omne molestum  
Tempus: alunt tristes suggrundia nostra labores,  
Postquam humiles habitare casas, & ferre luporum  
Cogimur insidias tacitosque horrescere morsus.  
Nocte cubant stabulis armenta, ubi pabula densos  
Implerant

## DAPHNIS

Implerant lento distinctos uimine clatros:  
 Nocte meant stellæ, tacitis radiantia telis  
 Corpora, & ut surgūt ita motibus acta recūbunt  
 Rursus, & Oceano splendentia lumina mergunt.  
 Nocte sedent sterili mites sub sepe uolucres  
 Et querulum mœsto compescunt gutture carmen.  
 Ergo fatigatas recreent tibi somnia uires,  
 Quosq; dies auxit, minuatur nox æqua labores.  
 Luce boues sequimur, tenebras superamus ad ignes  
 Et tandem uilis mihi culcitra suscipit artus  
 Lassatos nimium, & canna prosternit inani.  
 Heu duram uitæ sortem, curasq; molestas  
 Pastorum turbis. Sedenim quia sidera Daphnis  
 Aurea conscendit, diuisq; simillimus alto  
 Insedit solio, qua Regia lata Tonantem  
 Spectat, & illustris conuexos sustinet orbis:  
 Sub pedibus terras, & agentes nubila uentos  
 Prospicit, & forsitan pastorum inquit in ignes:  
 Cui nos uota damus, seiunctos matribus agnos  
 Annua uota Deo, & fumantia soluimus exta,  
 Erectasq; super, pecudes cumulabimus aras.  
 Interea molli signemus marmora uersu  
 Et tumulo statuisse notas iuuet: unde minores  
 Seclaq; uenturas uix effugientia sortes,

Præteriti

## ECLOGA VI.

*Præteriti discant confecta uolumina mundi.*

- » *Daphnis in hoc posuit sua frigidus ossa sepulcro*
- » *Et terrestre premi uoluit sub pondere corpus :*
- » *Daphnis hiantæis amor & spes unica Musis*
- » *Formosiq; gregis custos, populiq; corona,*
- » *Et tutela bonis, dum uiueret: altaq; cælo*
- » *Gloria, Diuinos ubi dexter adeptus honores*
- » *Spiritus, æterno iam numine gaudet: & inter*
- » *Fœlices tenet astra Deos, iunctusq; Tonanti*
- » *Perfruitur superis, & auitum sospitat orbem.*

*Viue pater Patriæ, & solida uirtute beatus :*  
*Tu decus omne tuis : seros imitanda Nepotes*  
*Qui docuisse queas, & facta domestica nostræ*  
*Posteritatis opus, longo cumulare Triumpho.*

## ECLOGA SEPTIMA,

FAVSTVS,

*SIVE VOTVM IN FRI-*

*DERICI II. POTENTISSIMI DA-*

*norum Regis Imperium, cui 20. die Augu-*

*sti, Anno 1559. fœliciter in-*

*augurabatur.*

G

Mælis

PHOEDRVS, MELI-

BOEVS,

**P**lerides, Helicon a sacro quas numine montem  
Incoluisse ferunt, Graiasq; habitare per urbes  
Cum magnæ primùm florerent Palladis acri  
Ingenio tempe, & rerum potirentur Athenæ:  
Dicite, Valbyaco diductum cespite Carmen,  
Effusosq; Deo gemitus ac uota Tonanti,  
Cum mihi certantes inter residere colonos  
Contigit, & Phædro suffragia condere nostro:  
Dicite, nec gelidi sonitus Aquilonis & imbres  
(Horrisono quamuis insurgant æquora fluctibus  
Nec subeant pontum geminati luce Triones.)  
Exhorrere deæ, nec aquas metuisse uelitis.

Vos Siculos peragrastis agros, & ditia campi  
Rura Syracusû: lentos ubi flexilis undis  
Dicitur Alphæus subter mare uoluerè fluctus,  
Occultasq; agitare uias: postquam Elidis amnem  
Liquit, & ignotum tacitis petit æquor arenis  
Subuectus cuneis clausoq; meabilis alueo.  
Vos tristes Aetnæ iaculantis ad æthera flammæ  
Permixtosq; globos pariter uidistis & ignes:

CUM



ECLOGA VII.

Cum mentem furijs animumq; subactus, in altos  
 Insilit Empedocles accensi montis hyatus  
 Impiger, & uano mortalia fugijt ausu.  
 Vos duras Cereris lacrymas atq; anxia matris  
 Guttur, ploratus uarios audistis, & acres  
 Pectoris affecti gemitus: cum scilicet aruis  
 Quereret hijs gnatham studioq; erraret inani.  
 Hinc uos prouecta Latias penetrastis in urbes  
 Diuisasq; freto terras, ubi dira Charybdis  
 Voluit aquas, canibusq; uterum succincta marinis  
 Scylla rates tristi satagit subducere fluctu.  
 Quis casiam uiolasq; leues altasq; cupressos  
 Explicet, & tenui comprehendat carmine fructus  
 Multiplices, Latio quæ circum plurima campo  
 Munera legistis: rigida dum menia Romæ  
 Vatibus haud timidos præberent libera uersus,  
 Ociaq; alta darent: populisq; accepta uirerent  
 Ingenia, & ferrent Capitolia docta Poetas?  
 Istinc suspectus nostrum retulistis in orbem  
 Arctoum q; solum pedibus tentastis: & altas  
 Haud dubitauit aquas Phæbus tranare, simulq;  
 Oceano dulces nostro statuisse Camœnas.  
 Circumfusa lauent quanquam freta cærulea terras

## FAVSTVS

Arctoe gentis, refluaq; tegatur in unda  
 Noster & ambita subsidat campus arena:  
 Attamen & molles recreant hic saepe Thalam  
 Delicia, & placido uersantur in equore Muse.  
 Has intra ualles ac Balthica mœnia multos  
 Consequit flores agitatus numine Phœbus  
 Aethereo, & uarijs depinxit honoribus arua.  
 Sit licet Assyrio pinguisq; ac diues amomo  
 Effundatq; Oriens rutilantis plena metalli  
 Pondera, & Australi crescant sua semina mundo:  
 Sit Latio Myrtus, sint dulcia uina falernis,  
 Balsama diffuso Syrius ferat agger hyatu:  
 Dum tamen & nostris surgant in montibus orni,  
 Fraxineusq; labos diuisq; simillima quercus.  
 Et cytisi lenes cingant humilesq; myricæ  
 Has terras, populusq; solo succrescere cernat  
 Florentes hederas & alentes robora Lauros:  
 Inter & audaces ferulas spinasq; minantes,  
 Lilia purpureo fronderè cacumine spectet,  
 Plenaq; collectis exundent horrea spicis.  
 » Haud omnes parili natura ac sorte beaui  
 Iuppiter: aduerso nonnunquam pignore certant  
 Oppositæ fluuijs terræ, ualloq; diremptæ:

DUM

ECLOGA VII.

Dum calor Austrinos, Boream dum frigidus urget  
 Spiritus, & Zephris tepidam motantibus auram  
 Aurifer Hesperias leni Tagus ambit arenas  
 Flumine, nec tristi glaciale frigore pontum  
 Occupat, & longo confundit prædia morsu.  
 Sit Paros insigni iam marmore nobilis: ast hîc  
 Fecundæ segetes, armenta; pinguia læto  
 Proueniant numero: tutis hîc pascitur aruis,  
 Nec Geticos horret strepitus, nec barbaræ gentis  
 Massagetæ timet arma fretum: quo phæbus azylo  
 Promouet, interea nostro dum lentior orbi  
 Confirmat uario turbatas omine Musas.  
 Hîc montes, hîc plana ferunt: hîc molle ferarum  
 Innocuum; genus stabulat: hic molliter undis  
 Subsaliunt tenero protensi corpore pisces.  
 At Leo sæuus abest, Tygris; immanis & Vrus,  
 Pardus abest, & Hyena truci quæ callida morsu,  
 Mendaci lacerat prolectos uoce colonos.

Ergò age cœlestes inter cultissime diuos  
 Phæbe pater: cuius Mycone celsa Gyaro; reuinxit  
 Ortygiam, manus: ac fluidos contemnere uentos  
 Iussit, & haud temerè sortes aperire futuras:  
 Huc traducta sinas tua numina: molliter auræ

## FAVSTVS

Instrepitant, notioq; fluunt è cardine uenti,  
 Cecropijsq; petunt nostras è montibus urbes.  
 Omnia deducunt huc sidera: concipe iussis  
 Alte meos, fatisq; tuos fer Apollo meatus.  
 Grynei poteras nemoris securus in umbra  
 Et Graio latuisse solo Tenedumue tueri:  
 Cum fas sacra foret tumulos habitare Pelasgos  
 Et Pandionijs subsistere nomen Athenis  
 Dulce tuum, soli q; daret tibi Græcia plausum.  
 Nunc uerò doctæ postquam aurea tecta Minerua  
 Barbaries, seuo nimium promota Tyranno  
 Occupet, & tristi fluat Attica tincta cruore:  
 Perrupisse potes quæcunque ibi mænia dirus  
 Hostis habet, ueteresq; domos gentemq; proteruam  
 Seminis inuisi non fracto linquere pacto.  
 Nam tibi sidereo cum res Ioue credita, diuos  
 Muneris autores habeas sanctiq; laboris:  
 Fluctibus exemptas tantis uincloq; Camœnas  
 Transtuleris nostras studio placatus in urbes.  
 Haud igitur blandos uereare capescere iussus  
 Phœbe pater: Iouis illa quidem diuina uoluntas  
 Expletæq; uices rerum, fatisq; propinqui  
 Circuitus ducit, teq; huc rapit æmula uirtus.

Nec

## ECLOGA VII.

Nec boream fugias gelidamue Lycaonis arcton,  
 Perfusasq; salo terras fluctusq; sonantes:  
 Hostibus ista quidem furiasq; metumq; proteruis  
 Incutiunt, terrentq; malos adiguntq; timore:  
 Mania sunt atq; ara bonis, tutelaq; sacris  
 Hospitibus, quorum dubijs non moribus errat  
 Incomperta fides, neq; fraudem pectora uersant.

Ergo age, qui solitus facili modulamine mentes  
 Sacraq; pastorum complecti uota, benignas  
 Excitus Delo prestare rogatibus aures:  
 Huc mihi paulisper plectrumq; sonosq; manuq;  
 Phoebe pater, Vati non irrita munera, flectas.  
 Te sine nil altum mens hac seraq; futurum  
 Concipit ætatis spacio: qui solus in omnes  
 Contuleris nostros haud languida secula uersus,  
 Temporis obuersi numeros metiris, & illos  
 Arbitrio statuis, nec inani lege gubernas.  
 Quapropter facili genium mihi pollice tangas  
 Accinctasq; manus operi pectusq; serenes:  
 Seu te fatidico compellam nomine Phœbum  
 Seu Iouis illud amas: seu magni Principis orbis  
 Luciferos quicumq; globos mundumq; creauit,  
 Extructasq; suo iam lumine prospicit urbes.

## FAVSTVS

Et iam tempus erat, quo primùm maxima fato  
 Daphnidis extincti collectos Cimbria fletus,  
 Visa est suppresso uultus squallore situq;  
 Deposuisse graues : exemptaq; questibus ora  
 Soluere, & exterso moderari pectora luctu :  
 Valbyaco cum Phædrus oues in monte caprosq;  
 Pasceret, & latè circumspectaret in arua :  
 Scandentem uidit Melibœum culmina montis  
 Et celeres captare gradus, cursuq; moueri :  
 Qui contrà Phædrum ueniens ut cernit & agnos,  
 Sic prior ingressus, uociq; silentia rumpit.

**Me.** Phædre tuas lato pecudes in monte uagari  
 Securus pateris : nec te mouet altius hircos  
 Ire uias, longumq; abitu tentare laborem.  
 En penè in segetes se corripit iste. quid ? alter  
 Iste, duas secum fallit ludendo capellas,  
 Abducitq; iter & studio contendit in urbem.  
 Interea lenti recubas sub tegminis umbra,  
 Et protecta rubi folijs tua membra sopori  
 Declinare paras, & condere lumina somno.

**Ph.** Latè equidem pecus errat agris ó pastor, & ipse  
 Tondentes spectro uirgultum molle capellas.  
 Ista uoluntati iam dudum pascua nostræ

Omnia

ECLOGA VII.

Omnia, quàm latè uolucres defigis ocellos,  
 Concessere : equidem Deus hæc mihi pulcra colono  
 Arua dedit: iussitq; capros pinguesq; iuuenos  
 Pascere, & inuisam Codro, sperare quietem.  
 Iussibus haud tamen ista meis armenta repugnant :  
 Nostra sed hæc quoties inflat mihi fistula buccas,  
 Effusosq; sono contendit in æthera cantus:  
 Protinus aut latè subigentes arua capellas,  
 Aut teneros paruis salientes collibus agnos,  
 Errantesq; greges reuocat dominoq; reducit.  
 Interea aut fesso libet indulgere quieti,  
 Aut calamos aptare sonis, ceraq; tenaci  
 Iungere dispariles proceraq; stramina culmos.  
 Scis etenim Melibœe sacram quandoque Mimeruam  
 Montibus in nostris letas agitare choreas,  
 Et pastorali diducere carmina ritu.

Me. Fœlicem tali rerum te sorte : quid ultra  
 Expetat armentis pastor, quàm pascua capris  
 Leta dari: proprioq; boues in cespite gramen  
 Sublegere, & totis recubare in montibus agnos?  
 Nos equidem miseri, subuersaq; penè tenemus  
 Prædia iam magna tacti formidine ruris :  
 Incerti quo fata ferant, quid uè iste relinquat

FAVSTVS

Agricolis miles, quem nunc certissima diuum  
Ira, solo iussit blandum considerare nostro.

Multa equidem populi iactata feruntur in ore,

Multaq; dira canunt pastoribus: ô mihi clades

Quis Deus auertat turbataq; corda serenet?

Ph. Deterior quo cuique uiro est animus ué manus ué

99 Sic mage uel sorti metuit uel pectora uanis

92 Afficit acta modis studioq; affligit inani.

Nos equidem præstare bonos Melibœe, deoq;

Parentes decet, ac hominum contemnere stultas

Quas præsaga mali fingunt sibi pectora curas,

Ipsas si libeat diri Busyridis iras

Et Latium uincat scelerum feruore Neronem,

Assertumq; lupis superare Lycaona tentet:

Haud percussa tamen frangas ita pectora, nullo

Vt spem non foueas secli melioris azylo,

99 Si facias quæ recta, & cœlo iudice uiuas.

Me. At nos ista dies comprehendit Phœdre: beatiss

Quo propè nil fuerit uirtutibus alta dicare

Pectora: quòd simili tandem mercede trahantur,

Et referant pariles rebusq; ac uoce coronas,

Siue foros spargunt maculis cænoq; perungunt:

Siue luto purgant Augiaq; stercora ducunt.

Instia



## ECLOGA VII.

Virtutibus uitæ numeros uirtutibus, omnes  
 Protinus insidias tranquillo induxeris æuo :  
 Contrà barbarico uiolens si iusta furore,  
 Et petulans quæ recta dolo subuertis & astu:  
 Haud minus exitium tibi conficis ipse: necemq;  
 Aut gladius iugulo celerat, fatisq; ministrat :  
 Aut diuturnus edit fluitantia uermibus ossa  
 Carcer, & immiti tabem squalore reponit.  
 Penè equidem qua tute agnos ô Phædre, pecusq;  
 Exigis arte foro: seu tu pinguedine lucrum,  
 Seu macro spectas & uili corpore damnum.

Ph. Haud ignota quidem faris Melibœe : quod ista  
 iam uarias pridem consciuit fama querelas,  
 Et persepe trucis commouit pectora uulgi.  
 Sed mihi nulla æquè pastor securæ uidentur,  
 Quàm recti studio uigiles fallentis ocellos  
 Ludere, & officijs auidos præuerrere morsus.  
 Haud etenim uirtus tantum sibi pulcra beati  
 Est pretij cumulus, patriumq; uirescit in orbem,  
 Verùm tuta etiam nonnunq; sede morari  
 Efficit, & frustra diros horrere Tyrannos.  
 Hac sese intereà sustentent rura uiriq;  
 Pastores, & acerba leuent spe fata bubulci.

Nans

FAVSTVS

Nam que gesta Deo, & mortalibus acta beatis  
 Lex inuicta probat, Stygius terit omnia Pluto  
 Atq; Acheronteo lacerat rectissima uultu.  
 Sed ne cede malis: fortasse ea tempora coelum  
 Et fortuna dabunt, ueteri quibus omnia ritu  
 Incipient medios inter splendescere luctus,  
 Et barathro concepta metus tormenta resignet.

Me. Haud mihi parua animo quondam spes ducta fuisset  
 O pastor, uitæ duros aliquando labores  
 Hijs stabulis, magno diuim potuisse leuari  
 Consilio, fatis saltem licuisset & auræ,  
 Daphnidis extincti genio superesse beato.  
 Ille etenim gregibus quantisper ouilia nostris  
 Et pecorum numeros, ac pascua leta senili  
 Curabat studio, redimitq; laboribus annos:  
 Et sibi pastorum coniuncta pericula duxit.  
 Scis Lycidæ pecudes tacitis quandoque luporum  
 Insidijs patrio direptas monte, diuq;  
 Errauisse boues, quotquot superesse rapinæ  
 Contigit, & nullo sparsos custode uagari:  
 Daphnidis at nostri cura studioq; reductos,  
 Et prætensa feris uenabula lata, plagasq;  
 Saltibus obductas, & cinctos agmine montes.

Con=

ECLOGA VII.

Exclusos igitur canibusq; plagisq; uirisq;  
 Exceptosq; lupos numero pendere: quibusdam  
 Direpta extremam celerarunt tergora mortem.  
 Nec meritas tantum penas fera capta luebat,  
 Amissos etiam Daphnis tum forte iuuenos  
 Et dispersa procul Lycidæ iumenta refecit.  
 Tantum illi nostris studiumq; & iuncta uoluntas  
 Rebus erat: miseris uixit tutela colonis,  
 Et sacra pastorum toto fuit anchora regno.  
 Tali foelices sociosq; & principe nostra  
 Pauimus, & patrio securi uiximus aruo.  
 Huius enim sæui rigidissima monstra leones  
 Insidijsq; lupi faciles, ursiq; proterui  
 Permetuere manus, umbros, uenabula, casses.  
 Ocia quapropter molli nos lenta salictio  
 Hactenus excipiunt, uiridiq; in gramine totos  
 Permittunt curare greges, pulsosq; periculo  
 Aut stabulis pecus, aut campis lustrare secūdis.  
 „ Eheu cur primo foelicia quæque recessu  
 „ Diffugiunt? forti cur optima durat azylo  
 „ Nulla dies? celeri rapiuntur turbine quæ sunt  
 „ Grata Deo, & late mortalia commoda firmant.  
 Ph. Ne tam, ne Melibœe animo turbere: parumper  
 Abstineas

FAVSTVS

Abstineas gemitu, nec te confeceris ira.  
 Pone pedum, placidusq; solo requiesce: uetusto  
 Nomine Valbyacis celebrari in montibus, audis  
 Nonne rubum? rubus iste Deo stat iudice, magni  
 Forsitan euentus & Ieri numinis index.  
 Aut quid suspiras etiam? requiesce sub umbra  
 Hac paulisper, iter tibi nostra leuarit  
 Fistula, quæ tenui iam nota foramine, multos  
 Vindicat à magnis quos uersant pectora luctus:  
 Hæc tibi uel rerum facie lassata recenti  
 Succinat, & grandes repetens feret alta querelas:  
 Vel minimè dubio comperta uolumine narret  
 Prospera: quæ uitæ spacium melioris obibunt,  
 Et nebulas Phæbi surgentis lumine, pellent

Me. Quæ pastor meliora canet? ne finge, quod usq;  
 Esse nequit: satis est miseros uixisse colonos,  
 Ne uanos etiam populus proscindat & urbes.  
 Nulla mihi uitæ fœlicis signa dies uè  
 Phædre, meos quocunque oculos animumq; reuoluo  
 Apparere queant: passim turbatur in agris,  
 Et miseras frustra tendunt ad sidera dextras  
 Pastores. Dormire Iouem si ritè uetustas  
 Finxit, & Aegipti fœcundos uisere colles:

Hoc

ECLOGA VII.

Ecce equidem seculo, parili dormire ueterno  
 Argumenta feris collecta è moribus huius  
 Sentinæ mundi, scelerum testantur in usu.  
 Olim fulminibus flammisq; uoracibus urbes  
 Terruit excelsi numen Iouis: omnia nostro  
 Ast impunè scelus peragit, plausumq; furori  
 Quisque petit: surdo nimium dant uota Tonanti  
 Hijs quicunq; malis finemq; doloribus orant.  
 Deniq; si repetam nostræ incunabula uitæ,  
 Et teneram à pueri ducam feruore iuuantam,  
 Longa equidē mihi secla fluū: iam maxima nostris  
 Lustra decem uarijs agitare tumultibus annos,  
 Et cano perfusa pilo mea tempora cernis.  
 Tu uerò primis etiamnum floribus ista  
 Ignoras scelix, quæ nos grauiora coloni  
 Aut sumus experti, aut misera uitauimus arte.  
 Ut nunc cunq; cadat, priscos ita Phædre recordor  
 Aetatis nostræ numeros uiridemq; iuuentam:  
 Ut studio prorsus uigili curaq; notarim,  
 Omnia præteritos quæcunq; amplexa parentes,  
 Continuare uices rerum sortesq; futuras  
 Debuerant, nostrasq; domos & rura tulerit  
 Pæterius plerunq; Deūm seu numen & auras,

F A V S T V S

Seu fatum sortita, euentibus usa malignis  
 Haud ueteres equare bono potuisse colonos,  
 Tradita nec solitis moderari legibus arua.  
 Aemylus hijs primùm nobiscum pastor in oris  
 Armentum latè paut, latissimus ipse  
 Imperio produxit agros pascentibus, acri  
 Strenuus ætatis genio, rigidusque peregit  
 Officium: posuit caulas, & ouilia septis  
 Armavit uigil, ac campis defixit apertis  
 Pascua, nec tenui suppleuit inania sceno.  
 Illo igitur custode boues habuere caprosque  
 Cornibus excelsis & dulci summe pingues  
 Maiores nostri: qui tum sua prædia circum  
 Hos tenuere sinus, & oues curare tenellas.  
 Hic cum cœlicolis cladem mimitantibus orbi  
 Huic nostro, fatis concederet: arua secundo  
 Excipit ingenio timidis seruanda capellis,  
 Qui cum consilio tantum non maximus, atrant  
 Sentijt ingenuæ sortem uirtutis, & omnes  
 Tristia frustrantur conatus tempora: nec se  
 Quòd curare potis, gregibus tutela subactis  
 Longa fuit: latuitque diu, seu fata perosus  
 Seu sua rura gemens amissaque prædia spectans.

Ex

ECLOGA VII.

Ex illo certè fluere & sublapsa referri  
 Vidimus hijs haud pauca locis: uariaq; colonos  
 Censura studioq; premi, gregibusq; paratos  
 Sæpe dolos pecudesq; actas pecudumq; magistros:  
 Donec ab æthereis prospectum est sedibus aruo  
 Huic tandem nostro: uenitq; in rura pecusq;  
 Daphnis, & egregio pastoribus adfuit usu.  
 Hinc aliqua miseri nos libertate potimur,  
 Atq; utcunque boues securi pascimus: illam  
 Indomiti quamuis subuertere fraude dolisq;  
 Haud metuãt. licet ipse etenim pulcherrima Daph-  
 Et tranquilla daret uiuendi iura colonis: (nis  
 Cumque ipso cura nullus maiore capellas  
 Lanigerumq; pecus concustodiret, & acres  
 Pelleret insidijs ursosq; luposq; ferasq; :  
 Haud tamen aut nostris auertere montibus omne  
 Quod quis iure ferum dicat, meritóq; fugandũ,  
 Aut gregibus poterat speratos ducere fructus.  
 Multa equidem sapiens tolerauit pastor, & omnes  
 Huc animos uertit, ne quid uicinia turbet,  
 Quod motum flammæ & longa incendia uulgat.  
 Impulit hæc igitur ratio me, ut Phædre putarim  
 Haud deinceps tuto nostras consistere uitas  
 Posse loco, aut placida seruatas lege beari.

H

Longa

F A V S T V S

**Ph.** Longa equidem rerum tibi sunt exordia, longos  
 Circuitus ducis: nec tete ambagibus altè  
 Prouectum capimus, nisi iam fortassè senili  
 Plurima consilio uideas, prudensq; priori  
 Coniungas seculo uenturae tempora uitæ.  
 At mihi si contra liceat contendere multò  
 Nunc magè polliceor fœlices esse futuros  
 Agricolas, quicumq; solum uel farre suburgent  
 Et producta citis fabricantur aratra iuuençis:  
 Vel pastorali ducuntur lege, bouesq;  
 Rurículas curant & pascua læta sequuntur.

**Me.** Et magè fœlices etiam? prius æquora latè  
 Quæ diffusa uides tumidis agitarier undis,  
 Destituent imo siccatum uertice fundum,  
 Et scopuli segetes referent campiç; marini.  
 Quin totis utinam liceat contendere uotis,  
 Ne miseros etiam post experiere magisq;  
 Afflictos: Satis est consueto fata lapillo  
 Voluier, & fastos non tristi sidere duci.

**Ph.** Haud tamen auersus nimiũ aspernere loquentem:  
 Percipias quæ læta uelim retulisse benignis  
 Auribus, & uotis animo coniungere nostris.  
 Et simul ignaros secli ne crede prioris  
 Viuere nos Melibœe: equidem trigesima messis

Hoc



## ECLOGA VII.

Hoc cinxit caput, & rebus percoxit acerbis.  
Multa quidem patrijs accepta penatibus hausi,  
Multa uia perspecta dabant haud pauca colonos  
Inter & afflictas didici tristissima turbas.  
Ac quamuis nequeam ueteres sperare Tyrannos,  
Aurea sub quorum florebat honoribus aetas,  
Fœlicesq; domus & rustica tecta fuerunt:  
Omnia uirtutum studijs quo tempore rura  
Stabant, nec misero nutabant arua tumultu:  
Attamen ut captus nunc est mortalibus eius  
Fortunæ: haud dubitarim maxima pastor in agros  
Commoda, non tenui rerum promittere quæstu.

**Me.** Ergo age si quod habes tam lætæ sortis & horæ  
Indicium, nostris ductum sermonibus iri  
Phædre sinas, uarijs spargi rumoribus arua  
Ignorare nequis, leuibusq; minarier agnis  
Exitium, quæ fama graues per rura querelas  
Seminat, ac dubios turbat malefuada colonos.

**Ph.** Haud equidem tantos animo Melibœe labores  
Solutis, scio despectas quæ tristia mentes  
Exagitant, fato non iam concepta recenti:  
Sed patribus iactata uiris, secloq; priori  
Cognita uenturis animos lacerare periculis.

FAVSTVS

Scis etenim, scis ipse pedes te & lumina nunq̄  
 Hijs aliquot lustris & rerum mole tulisse:  
 Diuersas ubi non uoces atq; horrida uulgi  
 Spargier audieris tetrico præſagia uultu.  
 Non etenim ſoli paſtores atra canebant:  
 Verùm iſtos etiam rigidos quæ ciuica muros  
 Turba colit; quiquè aërias loca ſplendida turres  
 Hæc habitant, metuere focis domibusq; ſuperbis:  
 Si qua fortè die crudeli occumberet umbra  
 Daphnis, & haud dubiæ ſacraret funera morti.  
**Me.** Hæc equidem ô paſtor res eſt, quæ rura uiroſq;  
 Vnica præcipiti formidine turbat & urbes.  
 Sublato fatiſ Parcaq; furente necato  
 Daphnide, qui noſtris placidè regionibus omne  
 Armentum curauit, & æquo pascua uultu  
 Complexus ſeruauit oues ouiumq; magiſtros:  
 Protinus euerſa rerum ceu lege, futurum  
 Vt pecus arripiant geniſq; ſerantur iniquis  
 Paſtores multi: qui quem magalia coelum  
 Et fortuna uelint iterum moderari, aut quem  
 Daphnidis extincti concuſſa capeſcere regna,  
 Sortem eſſent ferro ducturi & ſanguine: cum ſe  
 Quiſque ſuis rerum muniffet uiribus: atq; hunc

Vrbia

ECLOGA VII.

ole ciues, alium gens nostra coloni  
 Expeterent: alium quos purpura flexilis ambit,  
 Extremasq; togæ præcingit nexibus oras  
 Mæandro similis dubiaq; in imagine ludit:  
 Cumq; illum extincti cumulēt merita alta parētis:  
 Hūc foueat spes longa senem: trahat inclyta uirtus  
 Hunc etiam: huic animos congesta pecunia firmet:  
 Huic genus & proauī repetitas uindictet urbes.  
 Aut alium certē quemuis ferat error, ut altis  
 Montibus aspiret bellisq; mapalia mergat.  
 Quod si quæ campis ferat inclementia Diuūm,  
 Actum equidem prorsus fuerit: fractaq; salute  
 Has miseras euertet opes: cum præda futuri  
 Militibus sumus, & uitam fugiendo bipennes  
 Saltibus ignotis ac cœca in ualle tuemur,  
 Expulsi grauida cum uxore penatibus & dijs.  
 Heu dubiam uitæ sortem pastoribus, illos  
 Siue beet rigidi lectissima copia ruris:  
 Siue animos nullo recreent laquearia fructu.  
 Ph. Et mihi non aliæ dudum percellere mentem  
 Cæperunt curæ: tibi namq; hæc uera fateri  
 Collibitū est, postquàm sese angulus omnis in istas  
 Solueret, & tumidas proflarent guttura uoces.  
 Etsi multa quidem statuam, non pectoris alto

## FAVSTVS

In uulguſ diſparſa metu: quò certa quere...  
 Ac animi uero gemitu diſcrimina poſſent  
 Deplorare boni, patriam quæ forſitan olim  
 Afflictura forent clademq; datura Nepoti:  
 Sed magè ſollicitis nimium nimiumq; paratis  
 Ingenijs, nocti curas ac uota diei  
 Sacrauiſſe malos, quibus & uentura referrent  
 Optarentq; etiam patrijs certamina regnis.  
 Qui tamen auerſo fugerent ceu lumine tanta  
 Fortunæ rurisq; uices triſtiſſima damna,  
 Compoſitos pietate, dolis prætexere uultus.  
 29 Aſt uanas hominum ridet Deus arbiter iras,  
 29 Conſilijsq; modum ſtatuit nocuasq; retundit  
 29 Ingenij flammæ ſtringitq; pericula ſeptis.  
 29 Multa equidem cæcis animis mortalia uerſant  
 29 Pectora, multiplici glomeratos foeta furore  
 29 Corripiunt ignes: tanquamq; altaria diuûm,  
 29 Sic decreta putant facili ſe prendere dextra  
 29 Et ſperata diu certamina condere poſſe:  
 29 Cû n tamen & celeri rumpat Deus impia uultus  
 29 Conſilia, & prorsus ſtupidos ſpe fallat inani.  
 29 Ceu uenti ſtipulas, & mollia corpora magno  
 29 Diſcutiunt impulſa Deo, terrasq; per omnes  
 29 Turbine reiectant ſpacijsq; fugacibus urgent.

Aut

ECLOGA VI.

coniecta rogo ueluti cum cera liquescit

Et paleas ingens rapido uorat ignis hyatu.

Sic hominum turpesq; minas uanosq; tumultus

Dispulerint diui metamq; furoribus addunt.

Hinc igitur Melibœe, manūq; & sceptrā Tonantis

Aetherei, uultusq; bonos numenq; benignum,

Anxia senserunt patrio gurgustia regno:

Dum nullo cadit effectu temereq; fatiscit

Improba multorum rabies, quam rura subinde

Pertimere grauem, pondusq; immane colonis.

Me. Compressam uerò rabiem? uulgūq; susurros

Conticuisse? equidem quiduis pastoribus isto

Persuasum rumore prius tu dixeris: at me

Quorsum ago? nos istam rarò prorepsumus urbē

Phædre, nec huc studiū est & multa subire uolūtas:

Dulcia suppeditant nostræ mihi nectara uaccæ

Et niuei semota legunt dumeta iuueni.

At tibi uicina pecudes quòd ualle morari

Contingat, lateq; boues hæc pascua circum

Liber agas gregibus fœlix urbiq; propinquus:

Forsitan haud surda conceptas callidus aure

Multorum uoces & quæ uentura, notaris.

Propterea tenuis si quid tibi lætius aura

Pertulit, ac ruris despecti commoda narrat

FAVSTVS

Profer, & hac releua dubiam formidina

Ph. Vnum est, sollicito tibi quod Melibœe relaturum  
 Expediet curis animum, pectusq; sereno  
 Imbuet affectu & tranquilla in pace locabit.  
 Ac ne te ambages & longa per orsa tenebo,  
 Crastina spectaclum nostra hac præstabit in urbe  
 Lux tibi, turrigeros si fortè inuisere colles  
 Hos libeat, mediumq; foro turbaq; morari:  
 Quale prius nostris fugiens pastoribus ætas  
 Nulla dedit, seu uicinos repetiueris annos,  
 Seu ueteres ritus ac secula prisca reuoluas.  
 Quæ nos sæpe graui pastores prodita uultu  
 Tristia perturbant & multas hæctenus urbes  
 Sollicito nimium tenuerunt fata tumultu,  
 Versa fauore Deum ferimus celoq; dirempta.  
 Non etenim Melibœe greges aut plurima nostros  
 Turba petet, dextrâq; truci sua mutua densent  
 Vulnera, & obtrito stabulum consorte gubernent:  
 Aut tristi diuûm uultu fatoué maligno  
 Gorgoneisq; minis & iniqua ducitur urna  
 Ille, Deum soboles longè augustissima, nostris  
 Qui succedet agris commissâq; rura gubernet.

Me. Vnius anné igitur tandem contentio cessit  
 Arbitrio, & litem fato meliore diremit?

Et

ECLOGA VII.

...sit Pastor, res est & digna relatu  
ingresso stabulum nunquam latrasse Lyciscas.

Me. Haud me Phædre latet quid dira pecunia possit:  
Aut celata diu captatâq; gratia lucro.

Ph. Agnosco ueteres hominum Melibœe susurros:  
Sed tu fatales populi metuisse querelas  
Desine, iam tutos subierunt carbasa portus.  
Daphnidis æthereo delectus ab agmine natus  
Maximus, hæc equidem curabit ouilia, lato  
Imperio fœlix uentura & sorte beatus.

Me. Faustum ais, aruorum qui pridem iura uicesq;  
Pastorum duras, niuea comprehendere dextra  
Cepit, & haud tristi tolerare mapalia uultu?

Ph. Hunc equidẽ Melibœe, Deus quem et ardua uirtus  
Extra omnem inuidiæ numerum, sortisq; tremendæ  
Constituit iuuenem fatôq; exemit acerbo.

Sic surgunt, quos celsa ferunt ad sidera Diui.  
At quorsum lacrymas profundunt lumina? nũquid  
Displicet, agricolas aliqua iam clade leuari?

Me. Hostibus ista sient sceleris uestigia nostris.  
Ast mihi leticia perrumpit spiritus alti  
Corporis, & cupidum pertentant gaudia pectus:  
Haud me contineo, cum quanta pericula campi  
Aut fugiunt nostri, aut quanto seruantur honori.

FAVSTVS

Florescentq; bonis auidus considero: quid nos  
 O pastor deinceps, ni res ea uana feratur,  
 Aut animos onerare metu curaq; uelimus,  
 Aut non plaudenti cecinisse tripudia uultu?

**Ph.** Immò age, iam nullo metuendos turbine flatus  
 Iuppiter, haud sauo prospectans lumine campos  
 Et subtriste solum rurisq; pericula nostri,  
 Discussit radijs toto candentibus astro,  
 Dum uidet aërios & temperat omnia montes.  
 Utq; nihil lateat, Lux en tibi crastina totam  
 Producet pompam, qua tanto exordia FAVSTVS  
 Vindicet Imperio, nostraq; à gente Coronam  
 Suscipiat, ueteriq; ineat sacra munera ritu.

**Me.** Ah fortunato pastor me sidere tandem  
 Huc uertisse pedes: quamuis non parua sequutum  
 Damna, & sollicito tentantem pascua gressu.  
 Errauere boues etenim, fortassè tumultu  
 Dilapsi: nec enim studio custodis abactos  
 Suspikor, & tacita sparsos iam fraude uagari.  
 Tertia sectantem latissima pascua, ualles  
 Scrutantemq;, dies hæc circum prædia uidit.

**Ph.** Annè boues etiam? quo signo fare notauè  
 Discretos? equidem uicino nuper in agro  
 Palantes quidam pecoris custode reperti

Tum



## ECLOGA VII.

Lycida, prope decliues ubi littus arenas  
 aequoreis miscet nonnunquam fluctibus: & iam  
 Altera lux stabulis clausos, uiridique resectos  
 Gramine prospectat: Lycidas per rustica passim  
 Prædia seruatos memorat dominoque teneri.

**Me.** Alter & exertam pinguisimus explicat aluum,  
 Et niueo pullum distinguit limite corpus,  
 Qua protensa cadens subiectam linea frontem  
 Permeat, & geminas hinc atque hinc diuidit aures.  
 Alter spadices subtoruaque lumina uultus  
 Altior ostentat campis graditurque superbum  
 Ac minitans iter, & mento palearia pendent,  
 Posteriorque pedum tota suffragine candet,  
 Qua latus in dextrum niueo pulcerrima gyro  
 Ilia, crescentis referunt noua cornua Luna.

**Ph.** Certè equidem specie simili uultuque iugales  
 Vidimus hos Melibœe, nec est quod tristior illos  
 Esse tuos dubites, finemque laboribus addi.

**Me.** Ah Lycida, Lycida, ueteres ut ritè parentes  
 Maioresque tuos sequeris: quæ plurima nostris  
 Turba locis quondam ualuit pietatis & equi  
 Iusticiaque bono: magnis cum rustica starent  
 Laudibus, & florens habitaret prædia uirtus.  
 Nec quid Phædre prius mirer celebrèque canendo  
 Reppererim

FAVSTVS

Reppererim, libeatné magis uestigia nostri  
 Errabunda bouis curaué Deoué sequutum,  
 Posséq; seruatos stabula ad consueta reduci;  
 An uerò tantis succrescere laudibus æui  
 Progressus F A V S T O: nulloq; hæc celsa tumultis  
 Fata agier, pecudesq; illo custode per arua  
 Ruricolis impunè sequi pastoribus, atq; hic  
 Excusso tandem terrore licere morari?

Ph. Vtraq; res magni constat, certisq; Deorum  
 Consilijs agitur. Priuatis publica rebus  
 Anteferenda scias, quæ commoda legibus urbes  
 Ruraq; decernunt, patrioq; parantur honori.  
 Et tu iumentis equidem gaudere repertis  
 Ut merito possis, ita te quoq; uota precesq;  
 Concipias, moneo: Sceptriq; exordia Fausto  
 Fausta roges: adituq; noui tentare secundo  
 Imperij culmen, longaquæ in pace tueri.

Me. Imò age, iam toto saliuunt præcordia gestu,  
 Nec mihi cura boues: Fausti uirtutibus omni  
 Hæremus studio, uotisq; accedo futuris,  
 Pectoribus: neq; enim tenuis mea tibia quiddam  
 Grande sonare potis, meritis æquauerit auras  
 Docta nec Aonio suppleuerit ora calore.  
 Tu cantando, Deos hominesq; ferasq; solumquæ

Et

## ECLOGA VII.

Et cœlum reficis: rectè tibi nostra canenti  
 Fistula concedet, totoq; exacta Theatro  
 In plausus studiosa tuos geniumq; feratur.  
**Ph.** Tene etiam magno pastorum errore teneri è  
 Iudicioq; parum cauto Melibœe Poetam  
 Credere: uos facili uenalia cuncta labello  
 Salticolæ geritis: si quis tamen adferat aures  
 Vocibus, & dicto subscribat uanus inani.  
 Haud equidem tali res est pingenda colore  
 Vates eximius: sacra quem numina Lauro  
 Seraq; Phœbeis dignatur honoribus ætas.  
 Solus in hoc quondam nobiscum cespite Myrmix  
 Vixit, & egregio qui fallere tempora uersu  
 Norat, & insigni censura animoq; notauit  
 Carmina, seu primis perfecta laboribus, alto  
 Seu senio diducta fretum camposq; liquentes  
 Aethereosque ignes terrasque deosque referrent,  
 Et magno Heroum ueherent præconia plausu.  
 At postquam humanis exemptus legibus, æuum  
 In cœlos Myrmix reditumq; animumq; tulisset:  
 Haud equidem nostris, meritò quem rustica uatennæ  
 Eximium censura uocet, regionibus omnes  
 Extulit ingenij ueneres, cultumq; canebat:  
 Sed tenui quadam ac ieiuna pallade multi

Pierios

## FAVSTVS

Pierios tentant colles, & Apolline famam  
Aduerso captant, gelidóq; furore sequuntur.  
Tu tamen antiquos inter memorande Poëtas  
Iam dudum primas turba plaudente tulisti,  
Atq; exanilatos hominumq; Deumq; labores  
Construēdasque casas gregibus, rurisque beati  
Munera caniabas, segetesque pecusque canesque  
Et puer Edilium memini contendere frustra  
Surgentesque tibi musa captare corymbos.

**Me.** Ille equidem nostra tum uictus arundine, magno  
Pastorum risu turpes se fudit in iras,  
Perfregitq; manu calamos saxóq; relisit,  
Et mea commoto despexit præmia uultu.  
Fistula tum nostris hæc integra uocibus, acri  
Haud detrectabat certamine magna uocare  
Numina, & æquales inter lusisse colonos:  
Nunc carie corrosa sitúq; obscura senili,  
Horret doctiloquos inter certare Poëtas:  
Aut perfecta graui contendere carmina flexis.  
Qualicumque tamen superat uirtute sequamur  
Versus Phædre tuos, & Fausto uota feramus.

**Ph.** Haud me ductorem Melibœe decebit obire  
Officium. præstas senio numerisque uetustis,  
Nec tua formidat consuetos tibia cantus:

**Incipe**

ECLOGA VII.

...pe, propitio res hæc Ioue tanget olympum.

**Me.** Omnia crescenti uultusq; & lumina Fausto,  
 Terrarumq; sinus refluiq; uirentia ponti  
 Littora, prærupti montes campiq; supini  
 Detulerint. huc quodque ferat sua semina mitis  
 Naturæ, ac uotis accedant sidera nostris.  
 Omnia conceptos testentur ouilia plausus  
 Errantesq; lupi syluis, habitatq; pulcris  
 Lustra feris, damæq; leues capræq; fugaces.  
 Huc Phæbus radios, huc Iuppiter adferat aures,  
 Regia stella faces: huc se natura Deusq;  
 Vertat, & æterno confirmet uota Triumpho.

Esculus ut nemorum medio florescit, & altos  
 Præcipitat tellure pedes, fundiq; latentis  
 Viscera scrutatur: quantumq; cacumina cælo  
 Exerit, ac forti prospectat robore uentos:  
 Hærentes tantum submittit in intima fibras  
 Tartara, et acta Deo firmis radicibus extat:  
 Haud aliter summo contendat Faustus honori  
 Et caput æthereos fœlix assurgat in orbes:  
 Ruraq; suscipiat tutissima legibus & re,  
 Firmus iter uitæq; gradus, diuumq; fauores.

Mox, ceu nulla comã conuellunt frigora Lauro,  
 Sidereisue cadit perflata caloribus: at se

Suscitat

FAVSTVS

Suscitat & cariem contra fulmenq; Tonantis,  
 Et tentata gelu uirides fouet æmula ramos,  
 Inuictosque Deo seruat pulcherrima uultus :  
 Sic nostris florescat agris, & rure beato  
 Faustus agat, uiridiq; aduelet tempora Lauro  
 Semper, & à nullo metuat sibi frigora lapsu.

Deniq; Pampineis ut turgida uitis abundat  
 Frondibus, & dites intertegit uua corymbos :  
 Cum magna pendent glomerati classe racemi,  
 Nec metuunt subitos Autumni uindictis imbres:  
 Sic fecunda meent optataque secula FAVSTO,  
 Et patrio aspiciat ludentes rure Nepotes.  
 Omnia proueniant genio diducta secundo  
 Ac fortunata concludant tempora luce.

Interea crescant molli ceu condita coelo  
 Fœlices mali, quercusque & candida fagus  
 Optataeq; comis Lauri, corylusq; silerque  
 Pingueq; gramen equis, iuxtaq; dicata cupressos  
 Cautius assurgat spinis Paliurus acutis.  
 Utque sinu genitrix sobolem fidissima molli  
 Sollicitoque fouet, geminatâq; uiscera gestat :  
 Pastores alio non pectore Faustus & arua  
 Sospitet, & dulci complexu prædia condat.  
 Huius ut ingenio tandem ac solertibus annis

Agricolis

ECLOGA VII.

Agricolis ueterem liceat sperare salutem.  
 Secura dormiscat humo, certamq; quietem  
 Et gratos nulla captet formidine somnos.  
 Permeet hic terram, & uultu ferat omina miti  
 Phoebus, & haud nocuos immittat in arua calores.  
 Nec uentos acri propulsos turbine uerset  
 Tempestas, noceatq; gregi flatuue molestet  
 Surgentes calamos, nec ouilibus auferat agnos:  
 Sed prouisa Deo longæ stent cuncta saluti,  
 Et foelix patrio lætetur Faustus in orbe.

Ph. Ut fessis sopor est, & grata canentibus umbra,  
 Utq; oculis haurire diem, phœbiq; refusas  
 Prospectare faces cœlosq; uidere, uoluptas:  
 Sic mihi percellunt auidam tua carmina mentem,  
 Ac animis referunt, quæ maxima gaudia nostris.  
 Tunè etiam Musam, tunè accusaueris artem?  
 Aut tantam steriles saltus habitare Thalam?  
 Fœlices equidem tali te pastor alumno  
 Agricolas: quamuis longos iam segnior annos  
 Dinumeres, meritis si præmia uersibus essent,  
 Et solita ueteres florarent laude coloni.  
 Eia age, ne calamos quantum finit aura Deusq;  
 Submoueas labijs: sueta nec ab arte canendi  
 Fistula, quantumuis iam trita foramine, cesset.

FAVSTVS

Sed quid ego hæc tandem: fœlici carmen auena  
 Hoc canis, & merito nunq̄ spolieris honore.  
 Te sequar, ut nullis æquandi uiribus: istam  
 Quis simili statuât uersu contendere laudem?  
 Sic herclè ingenio facili studiòq; parato:  
 Siue id naturæ iam floreat indole, Myrmix  
 Quod meus expenso testatur Apolline: siue  
 V sibus incaluit, quod tu Melibœe Lycusq;  
 Et Serrana probat: nihil hîc mihi uendico, diuum  
 Pastor opus cœliq; ignes ac mûnera nosco.

Si qua meos igitur digitos iam spontè sequantur  
 Carmina, nec sterili consueta foramina labro  
 Expediam: diuos equidem sacranq; Mineruam  
 Atq; excita uelim Phœbei iura parentis:  
 Ut Fausto decreta ferant noua præmia, uersus.  
 Carmina Phæbus amat, uiridiq; exacta coronat  
 Lauro, quis Phœbo uelit aduersarier? orbem  
 A Ioue flammiferũ nitida & regit astra, secundus:  
 Et Faustus certè cantari dignus, in arua  
 Seu mitis tendit, seu spectat amabilis urbes.

Vix iam tondenti prima lanugine mentum  
 Barba resecta cadit: qualis cum lactea guttis  
 Purpureas miscent æquata coloribus: aut cum  
 Candentes inter uiolas rosa mixta recumbit

Eximij



## FAVSTVS

Eximijs rubicunnda notis oculosq; serenat:  
 Sic etas Fausto, sic uultus et ora manusq;  
 Imperijq; aditus, ueterique ex hoste Triumphus:  
 Omnia prima uirent: uix quinque recentia cōdunt  
 Lustra dies, nobisq; animum pastoribus addunt,  
 Posse aliquando dijs authoribus omnia prisco  
 Restitui collapsa loco, ueteresq; ruinas  
 Imperio refici, dilapsaq; rura reduci.  
 Interea agricolæ uotisq; animoq; sequamur  
 Ardua scandentem ueteri fastigia ritu,  
 Et Fausto quæ læta ac orbi commoda nostro,  
 Quæq; greges patria cumulent pietate, precemur.  
 Postq̄ etenim cœlo uisum est magnoq; Tonanti,  
 Aurea simplicibus tandem reditura colonis  
 Secula, & in nostros ea condere fata Nepotes:  
 Principio cœlos animis studioq; Tonantem  
 Complecti decet, ac Pacem deposcere diuos:  
 Supplice mox sacrata manu dare thura, molauē  
 Imbuere accensas onerareq; fructibus aras,  
 Et pastorales geminare in sidera questus:  
 Ut uotis animisq; pijs precibusq; secundis,  
 Perculso tristes ferimus quas ore coloni,  
 Cœlica placatis intendat honoribus aula:  
 Et faustam Fausto contingere posse Coronam

Per

F A V S T V S

Perficiant, socijsq; dijs hæc scepra teneri:  
 Et cœlo moderante pecusq; & pascua magno  
 Exundare bono, speratâq; commoda duci.  
 Nec frustrata polo cadit expectatio: læuum  
 Hesterna modulans eadem cum luce rogarem,  
 Intonuit, toto foecundus & æthere lapsus  
 Iuppiter optanti similis plausumq; ferenti  
 Maximus irriguo perfudit pascua rore:  
 Nec tamen aut steriles culmo deiecit auenas,  
 Aut sustentanti segetes decussit arista:  
 Pulcra serenato sed mox ut lumina uultu  
 Solueret, & letos cohiberet coniugis imbres,  
 Hos equidem nebulis radios uentisq; fugatis  
 Immisit Phoebus, tantôq; resplenduit igne  
 Quãto nostra uides hæc stringere gramina curru,  
 Et premere ardenti subiectas lampade terras.  
 En placidis etiam consistere fluctibus undas,  
 Molle nec excitis agitarier æquor arenis.  
 Ut tranquilla silent nunc omnia? et aspice quanto  
 Surgit agro, quantisq; tumet ditissima ripis  
 Scania, & Anchonæ consurgunt uertice turres,  
 Sublatiq; freto tendunt ad sidera montes?  
 En nostros uiridi frondere cacumine saltus  
 Ac propè completis agrorum semina spicis

Exopta

## ECLOGA VII.

Exoptare manus iuuenum falcemq; morari?  
 Aut uolucres etiam quali nunc aëra cantu  
 Permulcent? fama est quo tempore Daphnis acerbo  
 Funere sublatus superos conscendit in orbes,  
 Conticuisse, graui confectas rostra dolore:  
 Nunc uerò quantis agitata tripudia soluunt  
 Vocibus & magno circum stridore feruntur?  
 En quantas natura uices, quantumq; futuri  
 Euentus, etiam paruis inseuit alaudis  
 Alitibusq; uagis, quæ quanq; summa sequantur  
 Aethera, & eterno recreent modulamine uentos:  
 Omnia præfago tamen inferiora uolatu.  
 Penè sciunt, plaudentq; bonis, tristantur amaris,  
 Et sua non lætæ subducunt guttura sorti.  
 Utq; magis mirere, etiam Philomela canenti  
 Mollit uoce dies, curaq; abducit inani:  
 Cum tamen ætherei discessus Solis & ipsa  
 Sueta sequi: Phœboq; Austrum repetente morari  
 Sepibus, & nullo geminare tripudia uersu.  
 Ut ueniente etenim letatur Apolline, sic se  
 Continet exacto, cum scilicet ignea Cancrī  
 Regna fugit, notioq; refert sua fulmina Piscī.  
 Haud ea sola tamen, reliquas quoq; cura uolucres  
 Sollicitat, magnis en corpora parua cateruis

## FAVSTVS

Ferrier, & toto deducere carmina caelo  
 Vocibus, ac tenues implere sonantibus auras:  
 Audit humus, & pulsa refert ad sidera plausum.  
 Quare age concipias animo Melibœe sereno  
 Optima, iam deinceps turbatis hostia fibris  
 Nulla cadet, læti uenient ad aratra iuueni,  
 Telluremque; agitent facilem, sulcisque; recondant.  
 Omnia terra ferat culturæ obnoxia nostræ,  
 Florentesque; hederas, uiridesque; cacumine Lauros,  
 Et Casiam gratasque; rosas, calamumque; fragrantem,  
 Et populi studijs passim nascatur Amomum.  
 Denique; propitijs ineat coelestibus illud  
 Munus, & haud dubios cōdat sibi Faustus honores,  
 Commissumque; regat patrijs uirtutibus orbem.  
 Integer expediat quæcumque; negocia, nullo  
 Concidat affectu: miti Deus omine uultus  
 Proferat afflictis, nec acerbis cladibus actos  
 Terreat, & duro maculet solatia dicto.  
 Principis à uultu tristem discedere nullum  
 Fas statuat, nisi quem forsasse proteruia tristem  
 Flagitia, & meritis timidum fecere periclis.  
 Interea ditescat ager, Cererisque; beatæ  
 Fructibus exundent campi, gratumque; legumen  
 Ac segetes cumulent: iterumque; iterumque; benigno

Aucta

ECLOGA VII.

Mucta solo frumenta metant & farræ coloni.  
 Aquora luxurient & flumina piscibus: undas  
 Temperet Oceano Nereus, fluctusq; sonoros  
 Mulceat & magnas celer inferat accola merces.  
 Tum uerò quercus procerâq; corpora fagi  
 Glandibus incuruent ramos, ditiq; subulcos  
 Promisso firment, nec inania corpora mittant.  
 Balantes fetura greges pulcrosq; iuuenos  
 Multiplicet: siluis ludant & montibus altis  
 Capreoli, celeresq; feræ damæq; fugaces,  
 Et tenera lepores uestigent gramina plantæ.  
 Omnia fœlici conspirent sidere: Phœbus  
 Ipse suos miti circumferat aëre currus,  
 Nostrâq; propitio perfundat rura calore:  
 Et uiridi tellure leues proleçtet aristas,  
 Educatq; solo frutices, atq; excitet herbas.  
 Aërios parvæ uolucres & corpora, nidos  
 Compingantq; luto plumisq; sequacibus orrent,  
 Seminaq; æthereo ponant agitanda parente.  
 Deniq; pastores fœlix Concordia nostros,  
 Haud secus ac uinçlis & federe stringat ameno.  
 Nullæ equidem lites, nulla has iniuria turbet  
 Dira casus: metus omnis ouilia tuta relinquat,  
 Et procul in Scythicas abeat teterrimus oras:

## FAVSTVS

Optatâq; diu iam libertate fruantur.  
Agricolæ, tendantq; manus & brachia Fausto  
Non manicis constricta feris, non pondere duro  
Nec percussa minis, tacitosuê ferentia luctus.  
Ipse equidem noster communia prædia Faustus,  
Consilijs dextrâq; beet: promptosq; colonos  
Excipiat niueo recreetq; mapalia uultu.

Postremò quantum campisq; ac urbibus altis  
Astra boni, soliumq; Iouis diuumq; potestas  
Contulit, agnoscant pastorum turba ferantq;  
Vota dijs: animisq; litent si larga facultas  
Desit, & exhausto pecudes numerentur ouili:  
Pectora detulerint Fausto, sociaq; cathena  
Innectant dextras & spe sua damna leuarint.  
Tristia depellant genio curasq; resoluant,  
Protinus & nostro surgat gens aurea mundo.  
Consilijs Faustus populis, populusq; uicissim  
Præsidijs Fausto præat: ut dabit æmula uirtus  
Quemq; sequi, quo quemq; trahit pulcerrima uita  
Gloria, & æterno studium committit honori.  
Atq; ita non nostris tantum florescat in oris  
Pax sperata bonis: & agros contentio linquat  
Commotos dubiosq; metu tacitisq; periclis,  
Atq; exculpta sequi liceat pastoribus arua:

Verum

E C L O G A VII

quæ pridem dilapsa est turba, Gradiui,  
 Quassa malis uariasq; uices dirasque ruinas  
 Postq; passa siet, spes est hoc posse uel actam  
 Federe, & antiquos iterum remeare penates:  
 Et iuga prisca boues, stabula ad consueta reduci.  
 Sic iuncto tandem grege Faustus ouilia solus  
 Tota regat, molliq; fouebit pace colonos,  
 Et patriæ extincto feret ocia longa tumultu:  
 Diuorumq; aras rabida tueatur ab ira  
 Cyclopum furias contra fremitusq; Gygantum,  
 Et regat æternis pacatum legibus orbem.

Me. Huc huc Pierides, pulcerrima ferte Coronam  
 Premia, Phæbeis ornatam frondibus, atq; hæc  
 Florentes Lauro circumdate tempora Musæ.  
 O utinam mihi uel secli durissima nostri  
 Conditio: aut quondam pastoribus æqua uirisq;  
 Numina, quæ pingui cumulabant pascua succo,  
 Prompta facultatem facerent: licet ilia Codro  
 Rupta forent, odijsq; agitaret Lumbricus astra,  
 Cœlitibus grauis & totum execratus olympum,  
 Vatibus asscripto stares, quo maxima magnis  
 Ingenijs decreta loco sunt præmia. Sed nos  
 Hæc frustra uotis optamus: ut ardua surdis  
 Fabula narratur? solum nisi cognita Faustum

ECLOGA VII.

Excitet, aut seros apprehendat fama Nepotes.  
 Ph. Non satis est Melibœe pares, nisi forsitan & illos?  
 Desine, turbatis animumq; & uincula soluit  
 Ira ferox, potin æthereis tua lumina stellis  
 Iungere, et hos studio complectier arduus ignes?  
 Et te posse scio. Satis est: ruit ignea Phæbi  
 Fax uicina freto, pontiq; propinquat in undas.  
 Da calamos, libet errantes conferre iuuenkos,  
 Pascentesq; procul sonitu reuocare capellas.  
 Deniq; labentem potes hanc tibi fallere noctem  
 Mecum uix tenui Solem nox occulit umbra  
 Cum sublapsa diem celerat, lucemq; reducit.  
 Et Lycidas ueniet, Lycidæq; probatus Osiris  
 Istius antiqui factò studiosus aratro,  
 Et conferre iugo Tauros, & pascere doctus.  
 Mitia iam pridem sunt nobis poma, nouoq;  
 Sinus lacte spumat: caseos dabit Oosa canistris,  
 Et distenta truces submitunt ubera uaccæ.  
 Cras socio Lycida, neq; enim remorabor euntes  
 Sed sequar, ingressi claram ueniemus in urbem  
 Spectatum populiq; gradus turmasque potentum,  
 Et Fausto grates duplicatâq; uota feramus.

Α α β γ δ ε ζ Η θ  
 ϰ ι κ λ μ ν ο ϐ ϑ  
 ϱ ϲ ϳ ϴ ϵ ϶ Ϸ  
 ϸ Ϲ Ϻ ϻ

α β γ δ ε ζ η θ ι κ λ μ ν ο ϐ ϑ ϱ ϲ ϳ ϴ ϵ ϶ Ϸ ϸ Ϲ Ϻ ϻ



A a b c d e

f g h i k

l m n o p q r s

t u v w x y z

A a b c d e f

g h i k l

m n o p q r s

t u v w x y z

aa bb cc dd ee


M

2





VVITTEBERGÆ  
EXCVDEBANT HÆ.  
REDES GEORGII RHAVV  
4. die Aprilis, 1560.








Handwritten blue ink markings, possibly a library stamp or calligraphy, consisting of several characters.


ULB Halle 3  
001 008 501



Handwritten blue ink markings, possibly initials or a signature.







*Carmine complexus est Res Danicas aliquot hōis  
quare in Dania in Eleganzelling Sancti Marci  
Vid. dān. Worschi C. 1. Morum. Danic. c. ult.*

C. ERASMI  
MICHAELII  
LÆTI  
BVCOLICA,

*Cum dedicatoria*  
PHILIPPI MELANTHONIS  
*Prefatione.*

VVITEBERGÆ

Anno 1560.

